

寒山詩闡提記聞

上

河村藏書
第 74 號
文 學
第 29 號第 冊

250

土岐文庫
文庫17
W105
1



此之之廢生之生即年刻
苦是之生殺有寸生渡江
上藏中之生之生家之閣
投毫中一系徑之之但之
後世之系師可後之谷之
苦口勉稱終之生之飢凍
而遂之生學之生世之生身

苦學之生之生如生之生
平人貪之生之生古之生之
生之生之生之生之生之
子之生之生之生之生之
之網之生之生之生之生
現行之生之生之生之生
洋行之生之生之生之生

在教唯是一箇蓬頭
垢面菜毛凍酸家可
有子色是是作了為
壽善你長少以枯流
玉來你送情一初也
之類以移初上之空
法法法法法法法法
法法法法法法法法

曰古年所七粒尔際
或新好之空之自長
協生之空所亦設未
以志交世必持上之
蘇甲降手少心社二
在空上入心卷德區
破金生精枯氣到以

國朝詩集

之德出山道新居西道
 頓側時呈彩滿金司
 地後之破滿冰雪上
 以全少人向去之
 上借之持在人多
 人之主之往豈於人
 偶向燔香之山新

新錄之之酒長在
 握之未持之通之
 法叫曰上蘇中書入
 甘為之良粒粒米以
 之持也之疫鬼之
 付小者之
 所之亦人叫之

後身亦在口邊所為一校
伏以雲拜唱以及為以心集
且望素在羊一振慈心
以志何遠也此所修也
拜唱以子之志之云之云之
少細又云行七二一未愛
難遺德云未何廢

志之云之云之海華日各一
兼紅志海華日各一
云之云之校師行陳為
少觀德雲由之云之
之性者到行字心秘重
甘之云之隨釋之且沈
之化能君善力未云之

海多名之曰生宜室而本
之於室平一經究其
悉平一陸世之席以好
可故也其時紅矣性
後坐握子心之後子之
貴之曰之各經情派文
其後行卷司司之流紅

步電照一拂一披心路
也之佳來法子地以之
言世也之宜室是是是
全一也也佳識一也
之之之之之之之之
之之之之之之之之
之之之之之之之之
之之之之之之之之

攬報曰少一節以不其
 小訂正以補表在年懷
 釘去言三之三一時以漢而
 一者制送以較居安達
 朕慎怙志與排正志
 上九反執表交安安言
 傲之為志清不空凍敏

豎抑創以一笑廿上
 之有今進上上上之之縮
 一上上表表表表表表表
 禾不事上上中如龍
 上表群以之何以也情
 涼平之表表表之破初之舞
 蕭之之而之之如之表取也

義之電電矣形之昔曰德
 哉彼子之來矣家之上下
 生大之毛之各口之河梁棟
 才者一神便之身以去之之
 創之生世施之有惟併以
 大類於人之實之才後之璧
 日や之是まお打是持目

竹は竹た在なす年毛もす
 病治子竹字江酒美樹
 赤痛餅羊星堂紅送鹿
 去之初制膏員名日くく靴
 字字是志居漢子く竹紅
 枝之人く子や教維ま子
 家電心手紅様白美隊

行年以故其持懷之足
美氏以行秘之達周年
仲度之之展氏之之世
途品氏之手寄之之手
告報之未行之之人
美步之持之可如小涉

一商之也之標在在之
日聖擲標撤之之
形之之有快哉是則也
在因之羊母果之之也
之之之之攀技殊美之
疾速之業之之之苦諫之刺
之得之刺之之瑞得得之

蘇子平生作大雅詩文收時
各結身生之笑

志保才一千自蘇州主院

周提定庵中周主之志

泗凍布細紅香花之也



三隱詩集序闡提記聞

此集者唐太宗貞觀之間台州主簿朝儀大夫閻丘胤所編集也三隱者所謂豐干寒山拾得子也傳載傳燈會元等僧史與此集有大同少異隱者彙於謹切因上聲蔽也安也藏也詩者彙申之切志發言也釋名詩者之也志之所之也集者秦入切尋不聲雜也聚也說文鳥在樹上也故从佳从木

○三隱評曰諺有之曰小隱隱於山大隱隱於市予熟思之是膚淺皮薄之言而非論之精密者也嗚呼隱乎隱乎寔難得寔難辨者隱也夫隱也者所以韜德晦光者也縱被荷杖藜負瓢攜卷枯立石上鼻吟樹間內無

道德可貴外無才器可取是徒衒隱欺誑流輩底癡奴
縱擔鋤握蕨安自稱隱者于市于山總是困寒餓夫寔
可笑何足稱隱者吾聞南方有真隱非市非山靠非相
山潛無聲谷入不朽林結無住室頗走無所有市常鬻
不思議薪大利如化舍識高唱無生薪歌巢許不能儔
夷齊不見迹依何如此彼常不於三界現心意故也不
起滅定現諸威儀其斯是云太隱矣今寒公蓬頭垢面
斷衫破衣是非佗寂滅定中威儀哉將其人乎將又非
其人乎

朝儀太夫使持節台州諸軍主刺史上柱國

賜緋魚袋

閩丘胤選

詳夫寒山子者不知何許人也自古老見之皆謂貧人風
狂之士隱居天台唐興縣西七十里號為寒巖每於此地
古老者詩正月篇召彼古老風狂者韓詩百載如風狂
天台者廣輿記十一台州府下天台山道書謂上應台
星高一萬八千丈周匝八百里寒巖者廣輿記台州府
下寒石山在天台唐寒山拾得二僧居此傍有隱身岩
時還國清寺寺有拾得知食堂尋常收貯餘殘菜滓於竹
筒內寒山若來即負而去或長廊徐行叫喚快活獨言獨
笑

國清寺者在台州天台縣北六十里按智者別傳云智
者初嘗宿於石橋有一老僧曰今非其時三國成一有

大勢力人能起此寺寺若成國即清當呼為國清寺註云三國其時北齊高氏宇文氏陳氏鼎立皆為隋滅故成一統大師滅後煬帝造國清寺菜滓彙滓祖此切子澱也濁也志南記作澄瀘殘食菜滓以筒盛之長廊彙廊殿下外屋曰廊

時僧逐捉罵打赴乃駐立拊掌呵呵大笑良久而去且狀如貧子形貌枯悴一言一話理合其意沈而思之隱况道情凡所啓言洞該玄默乃樺皮為冠布裘破弊木屐履地大笑良久是非又手良久謂枯悴彙悴秦醉切音萃憂也劉向九嘆曰顧僕憔悴理合其意言質直隨意吐露去也况道情況彙虛放切譬擬也又滋也詩大雅况斯

削又臨望曰來况今言增益道情之義乎玄默言語道斷之義也樺皮為冠樺彙胡卦切詰木名可貼弓多識論加和左久羅布裘破弊裘彙渠尤切求皮衣也徐曰獸皮毛作之以助女工也木屐履地屐彙竭戟切木履也

是故至人遯跡同類化物或長廊唱詠唯言咄哉咄哉三界輪回

至人莊子一逍遙遊篇至人無己又不離真謂此至人○評曰咄哉咄哉三界輪回此語極難信難解不可容易去崑崙了若人見徹如見掌上則直下邂逅寒山子去徹底出離三界畢立地了知寒山詩中甚深密意盡

若人欲讀寒山詩，必先參此語，必定開看經眼，且久參上士一見，卽了。若又情解意度，輩者驢年不能夢見，或於村墅與牧牛子而歌笑，或逆或順，自樂其情，非哲者安可識之矣。胤頃受丹丘簿官，臨途之日，乃紫頭痛，遂召日者醫治，轉重，乃遇一禪師，名豐干，言從天台國清寺來，特此相訪，乃命救疾，師乃舒容而笑曰：

村墅墅彙承與切豎田廬也。又圃墅也。晉謝安圍碁於別墅，又古野字也。哲彙之列切音浙，明也。智也。說文：智也。書之曰：明哲謂知道，又謂知人也。書知人，則哲也。宋高僧傳：閻丘胤出牧丹丘簿官，事物紀原第六曰：至隋大業中，諸縣始置主簿，掌勾稽簿籍，糾正縣內，非違日

者，史記日者傳註：古人通卜筮，則謂之日者，其事則周太卜之職也。醫帝王世紀曰：黃帝使岐伯主典醫藥，以瘳疾。說文曰：巫彭初作醫，禪師善住意。天子所問經曰：天子問文殊師利言何等，比丘得言：禪師文殊師利言天子此禪師者於一切法一行思量，所謂不生若如是，知得言禪師乃至無有少法可取得名禪師。

身居四大病從幻生，若欲除之，應須淨水。時乃持淨水上，師師乃嘆之，須臾祛殄，乃謂胤曰：台州海嶋嶺毒到日，必須保護胤，乃問曰：未審彼地當有何賢堪爲師。仰師曰：見之不識識之，不見若欲見之，不得取相，乃可見之。寒山不殊迹，國清拾得普賢狀如貧子，又似風狂，或去或來，在

國清寺庫院走使廚中著火言訖辭去

四大大論五十二曰如佛說無處不有故名爲大嘆象
與溪同蘊困切巽含水噴也六書正譌別作噴非也須
臾名義集二摩睺羅毘曇爲須臾一日一夜共有三十
須臾中庸道也者不可須臾離也祛殄祛丘於切讓也
遣也殄徒典切田上聲絕也盡也滅也見之不識淮南
子說山訓竟曰凡得道者形不可得而見名不可得而
揚寒山文殊文殊師利般涅槃經曰佛告跋陀婆羅菩
薩言此文殊師利有大慈悲生於此國多羅聚落梵德
婆羅門家其生時家內屋宅化如蓮華從母右脇出身
紫金色隨地能語如天童子有七寶蓋隨覆其上九十

五種諸論議師無能酬對唯於佛處出家學道任首楞
嚴三昧佛涅槃後四五百十歲至雪山爲五百仙人宣
十二部經教化令住不退已至本生地於空野澤尼拘
樓陀樹下結跏趺坐入首楞嚴三昧身諸毛孔出金色
光遍照十方世界度有緣者身如紫金山正長丈六圓
光嚴顯面各一尋於圓光內有五百化佛一一化佛有
五化菩薩以爲侍者佛告跋陀婆羅是文殊師利有無
量神通變現不可具說若禮拜供養者生生處常生佛
家若未得見當誦持首楞嚴稱文殊師利名一日至七
日文殊必來至其所若有宿業障者夢中得見夢中
見者於現在身若求聲聞以見文殊師利故得須陀洹

乃至阿那含若出家人見者以得見故一日一夜成阿
羅漢若有深信方等經典是法王子於禪定中為說深
法亂心多者於夢中為說實義令其堅固入無上道得
不退轉我滅度後一切衆生其有得聞文殊師利名者
見形像者百千劫中不墮惡道若有受持讀誦文殊師
利名者設有重障不墮阿鼻極惡猛火常生他方清淨
國土值佛聞法得無生忍又八字文殊經曰世尊言我
滅度後瞻部洲東北方有國名大振那其國中間有山
名爲五頂文殊師利童子遊行居住爲諸衆生於中說
法八部圍繞西域記曰曼殊室利唐言妙吉祥舊曰濡
首名義集菩薩別名篇文殊師利此云妙德拾得普賢

菩薩別名篇郊輸跋陀或三曼陀此云普賢法華第八
普賢菩薩勸發品云爾時普賢菩薩以自在神力威
德名聞與大菩薩無量無邊不可稱數從東方來所經
諸國普皆震動雨寶蓮華作無量百千萬億種種伎樂
云云庫院庫貯物府藏院屋舍也廚者烹飪之處也孟
子君子遠庖廚註庖者宰殺之處

胤乃進途至任台州不忘其事到任三日後親往寺院躬
問禪宿果合師言乃令勘唐興縣有寒山拾得也否時縣
申稱當縣界西七十里內有一巖巖中自古老見有貧士
頻往國清寺止宿寺庫中有一行者名曰拾得胤乃特往
禮拜到國清寺乃問寺衆此寺先有豐干禪師院在何處

竝拾得寒山子見在何處

進途至任任彙如溪切說文保也信朋友曰保人保任也又堪也禪宿老禪者宿之義也行者要覽之上善見行云有善男子欲求出家未得衣鉢欲依寺中住者名畔頭波羅沙未見譯語今詳此方行者也乎經中多呼修行人為行者自晉時已有此人如東林遠大師下有辟蛇行者

時僧道翹答曰豐干禪師院在經藏後即今無人住得每有一虎時來此吼寒山拾得二人見在廚中僧引胤至豐干禪師院乃開房唯見虎迹乃問僧寶德道翹禪師在日有何行業僧曰豐干在日唯攻舂米供養夜乃唱歌自樂

舂彙諸容切搗米也黃帝臣雍父作舂曲禮隣有舂舂不相供養弘決四薦上曰供以身資尊曰養

遂至廚中竈前見二人向火大笑叫喚乃云豐干饒舌饒舌彌陀不胤自相把手呵呵大笑叫喚乃云豐干饒舌饒舌彌陀不識禮我何為僧徒奔集遽相驚訝何故尊官禮二貧士時二人乃把手走出寺乃令逐之急走而去即歸寒巖胤乃重問僧曰此二人肯止此寺否乃令覓房喚歸寺安置胤乃歸郡遂製淨衣二對香藥等特送供養時二人更不返寺使乃就巖送上而見寒山子乃高聲喝曰賊賊退入巖穴乃云報汝諸人各各努力入穴而去其穴自合莫可追及其拾得迹沈無所

龜前見一人龜彙則倒切遭炊龜淮南子曰炎帝善火
死而為龜後漢書李尤龜銘曰燧人造火龜豐干饒舌
書言故事多言曰饒舌阿彌陀此言無量壽又曰無量
光又稱讚淨土經曰清淨平等覺位翻無量壽佛高聲
喝喝彙許葛切漢入聲

乃令僧道翹尋其往日行狀唯於竹木石壁書詩并村墅
人家廳壁上所書文句三百餘首及拾得於土地堂壁上
書言偈并纂集成卷但亂棲心佛理幸逢道人乃為讚曰
徐師曾文體明辨曰狀下按劉勰云狀者貌也取其事
先賢表諡并有行狀廳佗徑切音汀屋也古治官處謂
之聽事毛氏曰聽事謂受事察訟漢書皆作聽六朝以

來始加六偈彙釋氏之詩詞也讚文體明辨曰贊稱美
也昔漢司馬相如初贊荊軻荊軻之事詳史記等也

乃為讚曰

鵝林著語曰又是渾沌氏眉白實頭官人恐
有認楚鷄去是非巫祝越樽俎者哉

菩薩遜世

可惜許歷良為賤莫以己不欲施人看佗走
何處去你言佗是何處本貴

示同貧士

仁者見之言之仁貧士見之言之貧試道佗
欠少箇什麼不依劉毅書信爭得到洞庭湖
道什麼將謂第二人富嫌千口少貧厭一身
多

獨居寒山

自樂其志

吐又是鬼家活計有什麼長處作麼生是寒
公生平所志當什麼臭皮襪有所志須吐卻

貌悴形枯

布裘弊止

出言成章

諦泉至理

凡人不測

謂風狂子

何處懶惰免饑凍是非分外事願來年蠶麥

熟羅睺羅兒與一錢離婁行處浪滔天

轉覆前車一日計在鷄鳴一生計在少年行

行且止避驄馬御史

入海擇浮漚漢漁唱新歌著何處嘆書安胡

餅上與狗亦不喫莫謗寒公好

劈百合尋中心漢剗好肉求精底呼奴呵婢

叱狗驅驢那處是不諦實底

用測為什麼一掃四海求一箇凡愚人終不

得我凡佗聖瞎屢生著什麼死急

如何謂得即可我謂風狂子君子愛財取之

有道風吹柳絮毛毳走雨打梨花蛟蝶飛

時來天台

入國清寺

徐步長廊

呵呵拊指

或走或立

喃喃獨語

盡大地一箇寒上座莫道時時來天台跛鼈

奔波追野禽達磨不來唐土

天台山中佳趣只在箇竹筒裡射土含沙待

影過燈籠躍入露柱佛殿走出山門

我今還家否還莫我為我

我若未還家須以我為我

夜行莫蹈白非水即是石吐者風狂疑殺滿

船人聞見覺知非一一山河在鏡中不見

前不到村後不入店拳左手咬中指出身甚

易脫脫體道卻難東山下左邊底

德雲閑古錐幾下妙峯頂呼佗癡聖人擔雪

共填井子細點檢還是趙州東壁胡盧

所食廚中

殘餘菜滓

吟謁悲哀

僧俗咄挫

都不動搖

時人自耻

母在子寒母去子寒耳頭口目卻生肉更將

黃金積一堆昨夜風扣門外竹又知賊不打貧家

君子亦有窮乎君子固窮好常喜世界教主

墜葉雖憐疎雨感黃梁爭如暮雲親

波斯說夢入市中和和婆婆人不會二桃殺

三士阿誰為此謀誰知席帽卞元是昔愁人

衣架走飯囊噴甚活哉將謂國清寺裡活衲

僧一箇還無正恁麼應初得正好明窗下安排

恰是羊公鶴或如張婆耳又似李母眉彈指

堪悲舜若多莫動著動著三十棒

好不太丈夫昨日明窗下喫幾枚麩麩白鷺

下田千點雪黃鶯上樹一枝春

作用自在

凡愚難值

即出一言

頓祛塵累

是故國清

圖寫儀軌

誰是不自在底人沒意知漢有什麼境界咳

唾掉臂終不倩別人誰家竈裡火無煙

道什麼用值為什麼者裡無第二人若值罪

過彌天一字不著畫八字無兩

佗道什麼弄泥團漢有什麼限聞事不真呼

鐘作甕莫謗寒公好佗終不出片言

特不知惹多少塵累來拳左手搔佛手即非

無屈右手觸狗頭何日免得
幻人狂走幻人嗔幻人在側叫蒼天一事更堪腸
斷在又隨月色過前州好與三十拄杖趕出山
依稀上已彷彿重陽如何得圖寫去普化往
日翻筋斗可惜畫蛇親添足噴長沙云底

圖是已開卷一

永劫供養

長為弟子

昔居寒山

時來此地

瞽首文殊

寒山之七

作麼生是供具天東南高地西北傾三日下
廚下洗手作羹湯未語姑食性先遣小姑嘗
良禽擇樹棲貞臣擇主佐寶處在邊更進一
步嘆埋沒已靈漢去你我不要
佗終不居寒山舉心擬向過新羅衆盲摸象
何日得全身鷄聲茅店月
佗終不來此地瞽婆畫作飛禽跡高聲呼曰
胤大夫胤應諾曰是什麼人迹板橋霜
歷劫無名錯安著名字好無視窮官人自家
屋裡物總不認取那咄東觸西觸
箭過新羅苦屈苦屈塗糊佗別人面門向道
莫行山下路果然猿叫斷腸聲

南無普賢

拾得定是

聊申讚嘆

願超生死

即今在什麼處特不知大行普賢大士著草
鞋向你肚裏橫三豎四珊瑚枕上兩行淚
不可向虛空裏釘楸去弄光影漢有何限非
嶮崖撒手絕後再蘊驢年曾不能夢見
遠之遠矣君子易事而難令說也小人難事
而易令說也相罵許你接嘴相唾許你洒水
咄蝦跳不出斗擬超出何處去病眼可憐見
穿華病猿終夜扣金鎖窮鳥終朝數竹籠

打一偈曰

讚辭分明數十字 無限塵沙當面撒
為報台州胤大夫 與佗殺不如自殺

寒山詩闡提記聞卷第一

一本作三隱詩集本志南記乎寒山子自言五言五百
 篇七字七十九三字三十一都來六百首而今考之五
 言二百八十五首七言二十首三言六首都三百十一
 首有之然則漏落于道翹之所采集者可知矣林間錄
 云寒山子詩曰人是黑頭虫剛作千年調鑄鐵作門限
 鬼見拍手笑考之於此集無所見焉此是二百八十五
 首之外之逸者而得之乎編年通論第二十卷曰昔寶
 覺禪師嘗命太史山谷道人和寒山詩山谷諾之及淹
 旬不得一辭後見寶覺曰更讀書作文十年或可比陶
 淵明若寒山子者雖再世亦莫能及寶覺以謂知言山

淵明若寒山子者雖再世亦莫能及寶覺以謂知言山

[Faint bleed-through text from the reverse side of the page, including characters like 寒山, 詩, 闡, 提, 記, 聞, 卷, 一]

谷吾宋少陵也所言如此大凡聖賢造意深妙玄遠自
非達識洞然亦莫能辨又黃山谷或時侍晦堂而道話
之次晦堂云庭堅今以詩律鳴天下也如寒山詩者賡
韻得和否魯直答曰昔杜少陵一覽寒山詩結舌耳吾
今豈敢容易可和韻哉直饒雖經一生二生而作詩吟
難到老杜境界矧亦寒山詩哉晦堂俛首之五言事物
紀原四李翰蒙求曰李陵初詩陵始變其體作五言格
也其始亦本於詩此彼有屋款款方有穀之類六帖
曰谷水始作六言亦詩公尸來燕來寧之類也
凡讀我詩者心中須護淨慳貪繼日廉諂曲登時正驅遣
除惡業歸依受真性今日得佛身急急如律令

凡者廣韻常也皆也或按計也今所謂凡者在出智愚
三賢四果共相兼也護淨者護持淨盡之義也諂丑刻
切音調諂諛面從曰諛佞言曰諂曲兵六切麴不直也
登都騰切等平聲躋也進也進業曰登又得也廉者文
中子云廉者常樂無求貪者常憂不足繼日二字出孟
子離婁真性筆削二真謂揀非偽妄獨顯圓成性謂自
體常住不變不異即揀諸空性急急如律令事文類聚
前集第二十八曰律令是雷邊捷鬼也此鬼善走與雷
相疾速故云如此鬼之疾走也此詩冠卷首實有深意
勸讀我詩故卷中序分也道翹采集之時隨得隨錄其
所述前後不可知有勸發之意故此記乎

○評曰此詩以勸發為皮體以護淨為骨肉以見性為心髓言大凡賢愚縹素及四果三賢人讀我詩雖暗誦去背諷了內無保護淨盡志操只一場兒底而已若又且讀且護淨得阿字不生慧日朗然而發生日光所照慳貪層冰諂曲積雪乍消除了無量億劫生死罪業即時寂滅不移步歸入真淨無漏性海不轉肉身而成就佛身迅速似律令者乎淨名經曰欲淨佛土先須淨心心淨淨土淨蓋護淨有四種一者欣上厭下專挾勝他心有精鍊刻苦者是外道護淨也二者厭生死求涅槃久觀四諦法門嫌喧求靜以灰心泯智為最後寶處者聲聞護淨也三者外感飛華墜葉內觀十二緣起覺我

空偏真理以為所證者緣覺護淨也四者常游泳四弘願海深達我法二空真理大成夢中佛事廣度如化群有者菩薩護淨也作麼生是衲僧護淨處吐哉吐哉三界輪回又曰牛過窻櫺頭角四蹄都過了因甚麼尾巴過不得

重巖我卜居鳥道絕人迹庭際何所有白雲抱幽石住茲凡幾年屢見春冬易寄語鐘鼎家虛名定無益

卜居楚辭有卜居篇鳥道李白詩西當太白有鳥道註道徑微窄止可容鳥過而已何所有陶弘景詩山中何所有嶺上多白雲文選謝靈運詩白雲抱幽石綠篠媚清漣鐘鼎家選西京賦張里家擊鐘食鼎虛名古詩良

無盤石，堅虛名復何益。省心詮要曰：虛名久不立，謬旨終有失。

○評曰：此詩賦山居幽致，隱棲高閑，以教誡浮世利名人。卜居有三種：隔生死、溟渤、靠偏執、海嶋、潛無明、暗谷、溪、愛惡、隍、塹、列、憍、慢、毒、樹、浴、邪、見、溪、泥、四、火、迸、八、風、吹、衆、苦、逼、迫、終、陷、墜、泥、梨、者、凡、夫、卜、居、也、恨、三、有、牢、落、恐、四、生、患、難、入、我、空、幽、谷、堅、偏、真、基、趾、耕、高、原、瘞、土、栽、焦、茅、菽、麥、開、陸、地、石、田、稼、敗、種、穉、穉、擔、思、念、屎、尿、浴、靜、慮、淤、泥、磨、八、識、賴、耶、片、瓦、闕、三、生、多、劫、壽、算、者、小、乘、卜、居、也、常、游、泳、四、弘、願、海、夙、認、得、寂、光、本、土、占、斷、實、相、佳、境、聚、集、空、華、聖、財、架、上、求、高、堂、溟、下、化、隍、塹、培、萬、善、園、林。

洒平等法雨，與群生俱遊。同成佛道者，大乘卜居也。作麼生是衲僧卜居處？熱鐵九重城。

可笑寒山路，而無車馬蹤。聯溪難記曲，疊嶂不知重。泣露千般草，吟風一樣松。此時迷徑處，形影問何從。

車馬蹤淵明詩結，廬在人境而無車馬喧。形問影，李令伯陳情表曰：榮榮子立，形影相訪。又淵明集：一有形問影詩，何從左傳僖公五年曰：一國三公，吾誰適從。

○評曰：此詩述山中幽邃，適居住趣，就中奇絕也。泣露千般草，吟風一樣松，此一聯寒山一區佳境，而寒山九虎嶮關，也是趙州所謂易見難透者也。若也透得過，大難見矣。往往作風光看了，作實相會了，作崑崙會了，作

陀羅尼判了特不知隔天涯若不作如上諸見恰如
老婆咬鐵板無半點氣味不生倦怠豎咬去橫咬來忽
乎而和牙齦咬破了滿口一團滋味必消萬劫饑寒山
秘訣一見即徹了若又未然一字字依舊九虎關鎖永
是葛藤窟裡癡漢多聞門外風狂

吾家好隱淪居處絕囂塵踐草成三徑瞻雲成四隣助歌
聲有鳥問法語無人今日娑婆樹幾年為一春

隱淪淪景龍春切倫沒也又小波曰淪桓譚新論云天
下神人五一日曰神仙二曰隱淪三曰使鬼物四曰先知
五曰鑄凝淵明歸去來辭曰三徑就荒松菊猶存娑婆
樹詩東門之粉篇曰東門之粉宛丘之榭子仲之子婆

娑其下注娑娑舞貞或曰娑婆樹作娑婆樹可也莊子
逍遙遊篇曰楚之南有冥靈者以五百歲為春以五百
歲為秋上古有大椿者以八千歲為春以八千歲為秋
○評曰娑婆樹兩字可上下之說大不可也失名子曰
當法界中央有娑婆樹或謂閻浮樹或名無明樹淨名
說為香樹黃梅此謂菩提樹枝條華果大茂盛矣以根
本無明為種子以實相為心髓以寂滅為麤皮依心地
生以十二緣為命脉以六塵為膏壤灑生死海水為資
潤板柯六處分一帶各帶二十五葉其上昇者為三十
餘樂所其垂下者為三所惡趣諸天見之為瑠璃寶聚
修羅見之為刀兵戈戟餓鬼見之為膿血焰火地獄見

之爲苦具鑊湯凡夫見之爲五濁穢土聲聞恐爲生死枝蔓辟支證爲偏真枯樹菩薩覺爲常寂光樹所見不同而有衆多假名具無量名義大凡四生八萬四千種令識共蠢蠢樹間菩薩乘願輪度盡衆生則唯有一乘菩提樹而已所恨菩薩雖願海深廣不能空衆生界依舊蔭深娑婆樹何日見彼朽枯故今菩薩有此嘆息幾年爲一春

琴書須自隨祿位用何爲投輦從賢婦巾車有孝兒風吹曝麥地水溢沃魚池常念鷦鷯鳥安身在一枝

古列女傳曰楚王聞於陵子終賢欲以爲相使者持金百鎰往聘迎之子終入謂妻曰王欲以我爲相今日

爲相明白結駟連騎食方丈於前可乎妻曰夫子織履以爲食非與物無治也左琴右書樂亦在其中矣夫結駟連騎所安不過容膝食方丈於前所甘不過一肉今以容膝之安一肉之味而懷楚國之憂其可哉亂世多害妾恐先生之不保命也於是子終出謝使者遂相與逃而爲人灌園巾車考兒南史隱傳曰陶潛嘗往廬山潛故人龐通之齎酒具贈之半途而遇之潛有腳疾使一門生二兒舉籃輿至欣然共飲燕曝麥後漢高鳳字文通南陽葉人家以農爲業鳳專精誦讀書夜不息妻嘗之田曝麥於庭令鳳護雞天雨暴至而鳳持竿誦經不覺潦水流麥妻還怪問方悟後爲名儒年老執志不

倦太守連召請恐不得免乃詐與寡嫂訟田後舉直言
至公車託病隱身於漁釣見于蒙求沃魚池吳越春秋
曰范蠡功成名遂隱居而養魚其池在會稽山下水中
有三江四瀆之流九溪六谷之模樣娛之鷓鴣莊子道
遙遊篇曰鷓鴣巢於溪林不過一技輦說文輦車也投
韻會弄也擲也

○評曰此詩述古賢各愛清閑樂枯淡守道養德底高
風以誠浮華世人

弟兄同五郡父子本三州欲驗飛鳧集須旌白兔遊靈瓜
夢裡受神橋座中收鄉國何迢遞同魚寄水流

飛鳧後漢王喬河東人爲葉令喬有神術每月朔望常

自詣臺朝顯宗怪其來數而不見車騎密令太中伺望
之言其臨至輒有雙鳧自南飛來於是候鳧至舉羅張
之但得一雙鳧焉後天下玉棺於掌前喬曰天帝獨召
我耶乃沐浴服飾寢其中蓋便立覆葬於城東百姓爲
立廟號葉君祠見于蒙求白兔三體詩註抱朴子云白
兔公彭祖弟子也白兔公或云赤松之師也常乘白兔
往來人間靈瓜韻府群玉曰東方朔曾以朱陵山靈瓜
獻武帝帝嘗之以爲美神橋幽真錄云巴園人收兩大
橘其大如二斗盎剖之中有二隻相對身長尺餘而象
戲一隻曰橘中之樂不減高山但恨不得深根固蒂
○評曰此詩嘆意識之浪落使人發起出離大志弟兄

同五郡者暗指第六意識者也五郡者眼耳鼻舌身等前五識也下我有六兄弟之詩一般也言五識各領一郡功勳封賞互相同獨意識流落故五郡各混亂五子各失處父亦隨困苦父子本三州者父者第八阿賴耶識也三州者具有法身般若解脫三德底常寂光本貫而法王天然貴胤也不圖今作傭賃客作賤人進無寂滅樂退有生死恐是故欲學長生久視術免老死飛鳧白兔靈瓜神橘四者丹竈功成底暫時功果也直饒恁麼去閱百千歲時了如閃電拂似石火照終歸遷流所悲常樂我淨鄉國不生本有家山迢遞隔絕無出離心譬如小魚依宅小水流液不知滄溟浩渺寔危哉

一為書劍客二遇聖明君東守文不賞西征武不勲學文兼學武學武兼學文今日既老矣餘生不足云

項羽本紀籍少時學書不成去學劍又不成項梁怒之籍曰書足以記姓名而已劍一人敵不足學學萬人敵東守等本傳云尹翁歸河東守田延年行縣至平陽召故吏令有文者東令有武者西閱數十人次到翁歸獨伏不肯起對曰翁歸文武兼備惟所施設書言故事壽考類曰顏駟漢文帝時為郎至武帝輦過郎署見駟龐眉皎髮上問曰叟何時為郎何其老也答曰臣文帝時為郎文帝好文而臣好武景帝好美而臣貌醜陛下好少而臣已老是以三世不遇上擢會稽都尉

○評曰此詩賦世榮難求縱求得亦暫時夢境而畢竟苦果所因以勸發出離大志詩意可解

莊子說送終天地為棺槨凡歸此有時唯須一番箔死將餒青蠅吊不勞白鶴餓著昔陽山生廉死亦樂

莊子將死弟子欲厚葬之莊子曰吾以天地為棺槨以日月為連璧星辰為珠璣萬物為齎送吾葬具豈不備耶何以加此弟子曰吾恐烏鳶之食夫子也莊子曰在上為烏鳶食在下為螻蟻食奪彼與此何其偏也見于莊子列禦寇棺槨禮記註附身曰棺附棺曰槨有底曰棺無底曰槨青蠅吳虞翻放棄南方自恨疏節骨體不媚犯上獲罪當長沒海隅生無可與語死以青蠅為吊

客使天下無一人知己者足以不恨見于活法白鶴晉陶侃為江夏太守母憂去職有二客來弔既去化為雙鶴冲天見活法生廉孟子萬章聞伯夷之風者桓夫廉○評曰此詩見世間菲儀之煩鬧卒然賦乎畢竟呵非菩提資料策勵者也昔陽即謂潔白廉耻胸宇也畢竟謂自家本有家山乎

人間寒山道寒山路不通夏天水未釋日出霧朦朧似我何由屈與君心不同君心若似我選得到其中

宋玉九辨曰君之心兮與余異車既駕兮竭而歸

○評曰此詩述寒山高勝以嘆人無入得縱你學得寒山形摸谷飲岩栖去破衣浪落去蓬頭垢面去憔悴枯

稿去爭敢得到此中何故與君心不同君所為心者逐
聲色取捨底識神隨好醜愛憎底妄心是名生滅之心
是為生死本根豈其夢亦得見寒山哉吾所謂心者則
不然心佛衆生平等不二佛界魔界淨利穢土有情非
情州亦森羅盡是一箇佛心無處非寒山不須入得總
是其中人是則一片無陰陽田地夏天冰未消名之為
妙峯孤頂名常寂光土或名謂寒山上下四維全不覩
纖塵到此無入得底賢聖無出頭底佛祖是故道寒山
路不通所恨君向心生滅門住著我向心真如門遊履
是故心不同到亦不能而已

天生百尺樹剪作長條木可惜棟梁材拖之在幽谷年多

心尚勁日久皮漸禿識者取將來猶堪挂馬屋

長條木書禹貢厥木惟條易說卦曰坎為水其於木也
為堅多心

○評曰此詩似賦賢人在野之嘆而底意呵二乘偏真
之枯槁天生百尺樹者人人本具底自性箇箇圓成底
佛心若人辨取得依四弘願行長養去則七覺八正四
無畏無盡法門體中圓備譬如長樹華果枝條盡具有
佛暫為攝取中下之機演四諦十二等法門謂之二漸
教法於茲覺我空偏真理證得有餘涅槃小果不欲學
菩薩威儀無心淨佛土是則剪成長條木者也擬神仙
婆羅門外道凡夫等所為道則雖似好箇長條良木若

比菩薩二利之願行則蔭溪幽谷一片枯槁底朽木也
是故有可惜嘆年多心尚動者佗既經歷三生六十劫
艱辛不生退困信心堅牢譬如老樹歷歲月中心猶擊
實日久皮漸禿者佗既日久退休拂拭故見思盡滲漏
空恰如朽樹皮膚脫落盡真實存佗日縱人天推出較
使伊代佛揚化為守閑淡制伏意馬心猿底窮子主長
得而已是故道堪拄馬屋是專依方等彈呵淘汰意述
者也

驅馬度荒城荒城動客情高低舊雉堞大小古墳塋自振
孤蓬影長凝拱木聲所嗟皆俗骨仙史更無名

雉堞左傳隱公元年都城過百雉國之害也注方丈曰

堵三堵曰雉一雉之墻長三丈高一丈又字彙雉堞城
上女垣也以白堊之故又曰粉堞墳塋墳墓也塋彙
廣雅曰塋域葬地也孤蓬影鮑明遠蕪城賦曰孤蓬自
振驚沙坐飛拱木左傳僖公三十二年曰蹇叔哭之曰
孟子吾見師之出而不見其入也公使謂之曰尔何知
中壽尔墓之拱木矣注合手曰拱又文選恨賦曰試望
平原蔓草縈骨拱木斂鬼註曰合拱之木縈繞死人骸
骨義也史彙師止切音使籍也記事者也又史官世本
黃帝始立史官倉頡居其職異作吏為指城主非也

○評曰此詩賦荒城敗落墳墓之傾頽使人憤起道情
鸚鵡宅西國虞羅捕得歸美人朝夕弄出入在庭幃賜以

金龍貯肩哉損羽衣不如鴻與鶴飄颻入雲飛

鸚鵡晉廓璞曰鸚鵡鳥舌如小兒背似金色腹如馬腦石山海經曰黃山有鳥其狀如鴉青羽赤喙人舌能言名鸚鵡又文選賦類有鸚鵡賦可見虞羅者虞人網羅也虞人司山澤者也周禮曰虞人數獸

○評曰此詩比也譬見世纏縛世榮關鎖爵祿人恰如鸚鵡在金籠雖形似福貴中心常憂惱如遁居樂道者似飛鳥在野雖欠見寵撫身心常快樂也大論三曰孔雀雖有色嚴身不如鴻雁能遠飛白衣雖有富貴力不如出家功德勝本此語乎

玉堂挂珠簾中有嬋娟子其貌勝神仙容華若桃李東家

春霧合西舍秋風起更過三十年還成昔蔗滓

容華文選曹子建詩曰南國有美人容華若桃李昔蔗涅槃會疏第一聖行品云譬如甘蔗既被壓已滓無復味壯年盛色亦復如是既被老歷無三種味一出家味二讀誦味三坐禪味

○評曰此詩賦香花不鎖香美人不永美以示有老死城中蛾眉女珠珮珂珊珊鸚鵡花前弄琵琶月下彈長歌三月響短舞萬人看未必長如此芙蓉不耐寒

蛾眉陸佃云蛾似黃蝶而小其眉勾曲如畫故詩譬莊姜螭首蛾眉珂丘何切音軻石次玉一云瑪瑙潔白如雪一云螺屬生海中爾雅翼貝大者珂黃黑色其骨白

可飾馬具。二月響列子湯問篇曰昔韓娥東之齊匱糧過雍明鬻歌假食既去而餘音遠梁欒三日不絕左右以其人弗去過逆旅逆旅人辱之韓娥因曼聲哀哭一里老幼悲愁垂涕相對三日不食遽而追之娥還復爲曼聲長歌一里老幼喜躍拊舞弗能自禁忌向之悲也乃厚賂發之故雍門之人至今善歌聲效娥之遺聲也由是考之月字當作日字乎以上管解

○評曰管解以月字當作日字說未盡善歟予謂月字而甚可而已論語述而曰子在齊聞韶三月不知肉味曰不圖爲樂之至於斯也三月之字本于此者乎夫子聞韶時四維八荒唯是一片蕭韶豈肉味而已和身心

共忘其意味夫子亦不能知不得說矣且謂之忘者也是自非聖德至善豈得而有至此哉小人反之若聞美人絃歌聲則其音韻薰染心肝之間魂蕩魄漾眷戀之餘如嫋嫋充耳根豈但三月哉甚者期年而猶不能忘且謂之三月響者也彼韓娥歌聲遠梁欒三日不絕者禦寇教句也三時而足而已

父母續經多田園不羨他婦搖機軋軋兒弄口啜啜拍手催花舞捲頤聽鳥歌誰當來嘆賀樵客屢經過

續經猶經營與次下經紀之字義同軋彙乙點切車輶也軋軋冠萊公詩幽窻軋軋度寒梭過古木切音戈小兒應聲

○此詩賦山家即事寒山詩中深密之秘訣學者若熟讀一回得拍手卷中多少嶮處同時永融

家住綠巖下庭蕪更不芟新藤垂綠繞古石豎巉岳山果獼猴摘池魚白鷺銜仙書一兩卷樹下讀喃喃

巉巖韻會高良又尖銳良獼猴摘異作青猿摘

○評曰此詩賦山居幽邃又是九虎關鎖

四時無止息年去又年來萬物有代謝九天無朽摧東明又西暗花落復花開唯有黃泉客冥冥去不廻

九天大玄經曰九天一曰中天二曰羨天三曰從天四

曰更天五曰晬天六曰廓天七曰咸天八曰沈天九曰

成天冥冥去不廻曹子建三良詩曰攬涕登君墓臨穴

仰天歎長夜何冥冥一往不復還見于文選

歲去換愁年春來物色鮮山花笑綠水巖樹舞青煙蜂蝶

自云樂禽魚更可憐朋遊情未已微曉不能眠

○評曰此詩賦山中逸樂不可換世營

手筆太縱橫身才極瓌瑋生為有限身死作無名鬼自古如此多君今爭奈何可來白雲裡教尔紫芝歌

瓌瑋廣雅琦玩也徐曰人才傀偉傀大良紫芝歌皇甫

謚高士傳秦世道滅德消坑黜儒術四皓於是退而作

歌曰莫莫高山溪谷逶迤曄曄紫芝可以療飢唐虞世

遠吾將何歸駟馬高蓋其憂甚大富貴之喪人兮不如

貧賤之肆志乃共入商洛隱地肺山

○評曰此詩演雖千英萬傑之士終為黃泉人之嘆
欲得安身處寒山可長保微風吹幽松近聽聲愈好下有
斑白人喃喃讀黃老十年歸不得忘却來時道
喃喃彙那含切音男呢喃言不了又燕語也

○評曰此詩意味幽長也不可羸吟去謂得安身處謂
寒山可長保是亦返照前護淨與卜居二評可委悉也
微風吹幽松近聽聲愈好近聽底作麼生不可崑崙去
讀黃老黃老道書而論長生久視大道者也茲所謂讀
黃老者非所以張吾伊聲者讀者菩薩溪入不生不滅
不老不死底實相真觀長時不休罷之謂也十年歸不
得忘却來時路十年者謂法成就之時也修行人最初

有真諦有俗諦有空理有假觀薰鍊日八則真俗不一
假空一馬途中與家舍二共打失是則中道寶處忘却
彼來時道底十年也學者須努力

俊傑馬上郎揮鞭指柳楊謂言無死日終不作梯航四運
花自好一朝成萎黃醍醐與石蜜至死不能嘗

俊傑朱子曰才德之異於衆者也四運者運氣論曰春
木運為初運夏火運為二運土用運為三運秋金運為
四運萎黃涅槃經十一曰猶如秋月所有蓮華皆為一
切所愛見及其萎黃人所惡賤盛年壯色亦復如是石
蜜涅槃經八曰無碍智甘露所謂大乘典如是太乘典
亦名雜毒藥如酥酪醍醐等及以諸石蜜服消則為藥

不消則為毒方等亦如是智者為甘露愚而不知佛性服者為毒

○評曰此詩呵無懶年少令發學道心柳楊謂術賣妖色也不作梯航者謂沈沒生死海中不求出世船筏也有一餐霞子其居諱俗遊論時實蕭爽在夏亦如秋幽澗常瀝瀝高松風颼颼其中半日坐忘卻百年愁

餐霞顏延年詠嵇中散詩曰中散不偶世本自餐霞人註餐霞謂仙也論時時時運也滕王閣序時運不等命途多違瀝瀝水鳴貝

妾在邯鄲住歌聲亦抑揚賴我安居處此曲舊來長既醉莫言歸留連日未央兒家寢宿處綉被滿銀床

邯鄲文選舞鶴賦邯鄲善為歌曲詩有駢曰鼓咽咽醉言歸又庭燎夜如何其夜未央注央中也兒家張文成遊仙窟兒家堂舍賤陋供給單疎既醉晉書謝安列傳四十九羊曇大山人知名士也為謝公所愛重太傅止後羊輟樂彌年行不由西門路嘗曰石頭大醉扶路不覺至州門左右曰此西州門羊悲感不已以馬策叩扉詠曹子建詩曰生在華屋處飄零歸山丘慟哭而去

○評曰此詩專演接引懷妾者寒公自言也邯鄲者指自家本有家鄉歌聲亦抑揚者唯有一乘圓音應上下根機唱出其巧妙如歌聲隨意而抑揚此曲舊來長者從過去威音王以來番番出世如來全無別調也既醉

莫言歸者一切衆生沈醉五濁惡酒諸佛百計誘引無
出離意在火宅內留著以長夜苦患猶爲半日看不知
四火來也寢宿處者菩提堂與本具家舍百味具足羅
綺千重也銀床者白一色露地白牛車也

快榜三翼舟善乘千里馬莫能造我家謂言最幽野巖岫
溪嶂裏雲雷竟日下自非孔丘公無能相救者

三翼文選浮三翼戲中注注三翼船也注池也越絕書
伍子胥內經大翼一艘廣一丈五尺三寸長十丈中翼
廣一丈三尺長五丈六尺小翼廣一丈二尺長五丈孔
丘公語先進子曰先進於禮樂野人也後進於禮樂君
子也如用之則吾從先進程子曰先進於禮樂文質得

宜今反謂之質朴而以爲野人後進於禮樂文過其質
今反謂之彬彬而以爲君子

○評曰此詩賢人在野之嘆也言我先進幽野人也終
身無顧問只孔子一人我從先進野人故知己乎

智者君拋我愚者我拋君非愚亦非智從此斷相聞入夜
歌明月侵晨舞白雲焉能拱口手端坐鬢紛紛

○評曰此詩賦寒公到法成就快樂境界所謂智者君
拋我言在真空寂滅空理人者恐有爲差別假諦在有
爲差別假諦人者捨真空寂滅空諦智指假諦愚指空
諦寒公今既得真俗不二空假同時中道純圓聖諦其
快樂不可言豈其與證我空偏真假城癡坐鬢紛紛底

可同日語哉若欲真正知寒公意大寶積經文應再三
熟讀寶積經曰佛言文殊師利你入不思議三昧耶文
殊言不也世尊我即不思議更不見有心相思議者云
何而言入不思議三昧我初起心欲入此定而今思惟
實無心相入三昧譬如人學射久習則巧也後雖無心
久習故箭發皆中我亦如此初起心學不思議三昧繫
心於一緣若久習成熟更雖無心恒與定俱已上經之
今詩中所謂智者君者指分別知見思議也愚者我者
指根本大智不思議也思議捨不思議而思議不思議
捨思議而不思議也故言互相拋不覺一朝契當非思
議非不思議底本有歡喜不足侵曉歌入夜舞

有鳥五色文棲桐食竹實徐勣合禮儀和鳴中音律昨來
何以至為吾暫時出儻聞絃歌聲作舞飲今日

山海經曰丹穴之山有鳥焉其狀如鶴五采名曰鳳鳥
飲食自歌自舞見則天下安寧韓子外傳曰鳳鳥止黃
帝東園集梧桐食竹實

○評曰此詩山中不圖見希有珍禽偶介而賦

茅棟堊人居門前車馬疎林幽偏聚鳥谿闊本藏魚中果
攜兒攜臯田共婦鋤家中何所有唯有下牀書

茅棟白屋也猶艸廬也

○評曰此詩見野人清閑居處卒然述

登涉寒山道寒山路不窮谿長石磊磊澗闊草濛濛苔滑

非關雨松鳴不假風誰能超世界共生白雲中

文選古詩青青陵上柏磊磊澗中石韻會磊衆也

六極常櫻困九維徒自論有才遺草澤無藝閉蓬門日上

巖猶暗煙消谷尚昏其中長者子箇箇恣無禪

六極書洪範一曰凶短折二曰疾三曰憂四曰貧五曰

惡六曰弱注曰凶者不得其死也短折者橫夭也九維

曰九疇乎書洪範曰天乃錫禹洪範九疇一曰五行二

敬用五事三農用八政四協用五紀五建用皇極六入

用三德七明用誓疑八念用庶徵九曰嚮用五福威用

六極遺草澤文選左木冲詠史詩何世無奇才遺之在

草澤閉蓬門高士傳張仲蔚博物善文好詩賦常居窮

素所居蓬蒿沒門長者窮子出法華第三譬喻品

○評曰此編比也賦可受五福之賢人在野困六極然

九疇等書經皆閑事乎嘆以比行人多在邪路不能入

真正道所謂六極者第六意識也極不祥之極也九維

者指行人最後證果第九清淨識也言雖人人具有本

有圓成自性含容十虛不為陝歸收微塵不為廣本來

明妙本來清淨不了知心源故意識恣混亂纏縛種種

困苦懊惱九維徒自論者踏破第八賴耶暗窟則第九

清淨真識乍煥發到大解脫之田地雖諸佛苦教論無

人趣此真修似諸佛只自徒論說縱又有具聰明強記

之才德底之人永陷墜經論文字草窠終為吟艸澤底

窮兒無才閉蓬門，或又一文不知昏愚鈍。漢者死執一
般癡禪道，文字者不足把話頭。不足看，只箇不思善不
思惡之處，卽佛法樞要。祖庭玄機，閉目切齒。今日亦暗
昏昏地，去。明日亦昏昏地，去。終一生爲黑暗鬼窟，守
屍寔可悲也。日上巖猶暗，言雖寒山面前阿字不生，慧
日透霄漢，徹黃泉甚洞然甚明白。如上輩者不能見煙
消谷猶昏，夫三界夢幻火宅，雖毒火旣消，臭煙永滅，爲
娑婆卽寂光淨刹，爲如上輩爲黑暗長夜牢獄，所以言
其中長者子箇箇捉無禪
白雲高嵯峨，綠水蕩潭波。此處聞漁父，時時鼓棹歌。聲聲
不可聽，令我愁思多。誰謂雀無角，其如穿屋何。

棹歌文選善注棹歌發棹而歌也。誰謂詩行露篇曰：誰
謂雀無角，何以穿我屋。

○評曰：愁思多者，世稱文人詩夫者，非所以以明駢皓
齒朝歌夜絃爲樂者。聽笛聲以攢額，聞棹歌以落淚，處
有多少，感情有多少，佳趣是詩家拋身捨命處。所謂誰
謂歌聲無意，何以令我愁思多。

杳杳寒山道，落落冷澗濱。啾啾常有鳥，寂寂更無人。浙浙
風吹面，紛紛雪積身。朝朝不見日，歲歲不知春。

落落彙難合也。啾啾鳥鳴聲也。浙浙風聲也。
少年何所愁，愁見鬢毛白。白更何所愁，愁見日逼。迫移向
東岱，居配守北邙。宅何忍出此言，此言傷老客。

東岱文選古詩常恐游岱宗不見復故人注岱宗泰山也人命屬之樂天詩東岳前後龜北邙新舊骨北邙宅訓解註老經卜其宅兆注塚穴曰宅墓城曰兆間道愁難遣斯言謂不真昨朝曾趁卻今日又纏身月盡愁難盡年新愁更新誰知席帽下元是昔愁人

席帽席字當作蓆本羌人首服以羊毛爲之謂蓆帽秦漢競服之後以蓆爲骨而鞞之謂之蓆帽

○評曰此詩稱贊菩薩利他之悲願愁者指度生大慈今言新發意菩薩初聞諸佛菩薩度生願海深廣而不忍棄置苦趣常生疑悔後隨大事成辦了次第悲願厚重所謂似衆生界未空我心終不飽者所以道年新愁

更新誰知席帽下者言我愁思切非唯今日曠劫以來切二利願行底愁人也

兩龜乘犢車驀出路頭戲一蠶從傍來苦死欲求寄不載爽人情始載被沈累彈指不可論行恩卻遭刺

蠶柔且介切長尾爲蠶短尾爲蝎蜂蠶垂其爲毒在後

○評曰此詩賦初心菩薩根力微時以教諭行人龜古來爲智慧正宗贊石頭傳云石頭和尚一日夢與六祖乘一龜游泳溪池覺原之曰靈龜智也池聖海也又兩龜定慧二法及二利願行也今言根熟之菩薩依二利願行乘大白牛車利一切衆生今根未熟菩薩故言乘

○聞披詩問卷一
犢車出路頭者入麝垂手之義也一蠶從傍來者一點
客塵緣也行人正受之力微故不能觀照彼轉得領納
損道情是被沈累也行息卻遭刺者譬欲救錯投水人
力微故卻共溺死之義也

三月蠶猶小女人來采花隈牆弄蝴蝶臨水擲蝦蟇羅袖
盛梅子金篦挑荀芽鬪論多物色此地勝余家

金篦魏武帝患目華陀以金篦刮之遂愈

○評曰此詩亦是寒山九虎關鎖學者必莫崑崙去此
地勝余家何處是寒山家舍何處是勝處須是子細參
窮見得分明者見寒山處處佳境

東家一老婆富來三五年昔日貧於我今笑我無錢渠笑

我在後我笑渠在前相笑儻不止東邊復西邊

○評曰此詩亦是寒山一處好風景

富兒多鞅掌觸事難祇承倉米已赫赤不貸人斗升轉懷
鉤距意買絹先揀綾若至臨終日弔客有蒼蠅

鞅掌莊子在宥篇遊者鞅掌以觀無妄注鞅掌紛泊也
詩或王事鞅掌鞅掌失容也言事煩勞不暇為儀容也
祇承彙章衫切支適也但也蓋祇字有兩音音岐者神
祇之祇大也音支者適也但也書大禹謨祇承于帝不
貸人斗升事文類聚別集第十八卷王符傳寧見朽貫
千萬而不忍貸人一錢情知積粟朽倉而不忍貸人一
斗骨肉怨望於家細人謗讒於道鉤距多智計較曰鉤

距漢趙廣漢為京兆尹善為鉤距以得事情設欲問馬價則先問狗次問羊又問牛然後及馬參伍其價以類相準則知馬之貴賤不失實矣是謂鉤距注距如鉤鉤倒掛也吞之則順吐之則逆使人入其術中而不能出以索鉤其隱情也見于書言第五卷又詳蒙求中卷

○評曰此詩彈呵世鉤距人也鉤距設知計應利者也買絹先擇綾者譬茲有一夫常施姦計以欺人為賢一日整衣正襟從一奴直行市上行擇巨商家警咳入商家亦調聲迎入夫曰有使命命予擇綾及綺羅何軸有其精好者麼商家曰有寔有極精好者請且入擇焉越設席延酒果以饗之少焉抱綺羅驚目底數十軸來推

出夫乃公公然飲噉了結口眇目豎擇橫擇擇漸得十數軸命之包裹自印上頭了且命商記其價直搭印懷之告曰王家必要今明之間送金與子手書以取之出矣商家亦走出兩手托履頭送之夫行三五步而還來告曰與好絹二匹是亦予宰家需而金空于囊中量也擲出金囊擇金取之商出好絹二匹落其價直三分之一以與之亦送如始是但欲得心於彼快賣卻彼向擇底者也其后雖向期月寂無消息終使商家空搔頭實可惡矣

白鶴銜苦桃千里作一息欲往蓬萊山將此充糧食未達毛摧落離群心慘惻卻歸舊來巢妻子不相識

離群禮記檀弓上篇子夏曰吾離群而索居亦已久矣
○評曰此詩賦多少學仙鍛求久視人古來一箇無成
就得空困苦終歸老死以命鞭進真修人者也
慎居隱幽處乍向國清中時訪豐干道仍來看拾公獨起
上寒巖無人話合同尋究無源水源窮水不窮

○評曰此詩賦寒山自得底佳趣仍來量仍頻也尋究
無源水此兩句一篇主意也無源水者人人心上生滅
忘心如霧浮似煙曳晝夜相續譬如溪間一脉流水哀
哀四序無間渴一乘者汲之盡得其枯竭日以欲成菩
提所以晝夜困苦歷三僧祇劫菩薩直向本根究竟大
事作麼生究竟者辨道人憤起得精神親向彼起處尋

此水自何處起何處爲本根豎尋橫窮尋窮終和尋覓
底心一時打失此卽虛空銷殞鐵山摧底時節峻崖撒
手絕後再蘓底好消息也是道窮盡無源水雖窮盡水
依舊哀哀而無間竭未徹見本源以前者生滅無明妄
心旣徹見得出時薩波若海中最妙最玄底大法雨滴
滴圓明滴滴窮竟洒沾三草根莖滴資六趣饑渴歷三
大劫無盡時度一切衆無乏時其斯之源究水不窮矣
生前大愚癡不爲今日悟今日如許貧慙是前生作今日
又不修來生還如故兩岸各無船渺渺難濟渡
璨璨盧家女舊來名莫愁貪乘摘花馬樂撈采蓮舟膝坐
綠熊席身披青鳳裘哀傷百年內不免歸山丘

璨璨文選汪衣服鮮明，負莫愁，圓機活法曰：石城有女子名莫愁，善歌謠，若人聞之，有忘愁之聲，故名莫愁也。摘花馬，天寶遺事曰：長安俠少，每至春時，結朋聯黨，各置矮馬，飾以錦鞵金絡，並轡於花木下，往來使僕從執酒盃，隨之遇好酒，則駐馬而飲，采蓮李太白採蓮曲曰：若耶溪傍採蓮女，笑隔荷花共人語。見古文前集。綠熊席，事文類聚十一曰：衛靈公天寒，鑿池，宛春諫曰：天寒起土，恐傷民。公曰：天寒乎？宛春曰：公衣狐裘，坐熊席，是以不寒也。青鳳韻瑞引拾遺記曰：周昭王以青鳳毛為裘，歸山丘者。文選曹子建詩曰：生在花屋處，零落歸山丘。先民誰不死，知命復何憂。

氏眼鄒公妻邯鄲杜生母二人同老少一種好面首昨日會客場惡衣排在後祇為著破裙喫他殘齏麩

惡衣排在後智度論十四曰譬如剎賓三藏比丘行阿蘭若法至一王寺寺設大會宗門人見其衣服麤弊遮門不前如是數數以衣服弊故不得前便作方便假借好衣而來門家見之聽前不禁既至會坐得種種好食先以與衣眾人問言何以尔也答曰我比數來每不得入今以衣故得在此坐得種種好食實是衣故得之故以與衣齏麩餅也

○評曰此詩託言於貧富示人情冷暖

獨臥重巖下，烝雲晝不消。室中雖暍暖，心裡絕喧囂。夢去

遊金闕魂歸度石橋拋除闢我者歷歷樹間瓢

喻曖曖白石橋在天台山樹間瓢逸士傳許由隱箕山無盃器以手捧水飲之人遺一瓢得以操飲飲訖挂於木上風吹瀝瀝有聲由以為煩遂去之

○評曰此詩述清閑獨脫境界

夫物有所用用之各有宜用之若失所一闕復一虧圓鑿而方柄悲哉空尔為驛騶將捕鼠不及跛猫兒

圓鑿方柄史記孟子傳持方柄欲內圓鑿其能入乎索隱曰方柄筍也圓鑿其孔也謂工人斲木以方筍而內之圓孔不可入也故楚詞云以方枘而納圓鑿者吾知其齟齬而不入尔為王仲宣詠史詩曰秦穆殺三良惜

哉空尔為見于文選驛騶莊子秋水篇曰騶驥騶騶一日而馳千里捕鼠不如狸狌

○評曰此詩述物各隨其性而可用之意

誰家長不死死事舊來均始憶八尺漢俄成一聚塵黃泉無曉日青草有時春行到傷心處松風愁殺人

誰家長不死左傳子彥曰人誰不歿始憶八尺漢文選陸子詩曰昔居四民宅今託萬鬼隣昔為七尺軀今成灰與塵漢稱漢說見事物紀原第十傷心處北邙地也

騶馬珊瑚鞭驅馳洛陽道自矜美少年不信有衰老白髮會應生紅顏豈長保但看北邙山箇是蓬萊鳴

美少年文選阮嗣宗詠懷詩曰朝為媚少年夕暮成醜

老自非王子晉誰能常美好蓬萊嶋釋曇鸞法師初學
仙術後謁菩提流支三藏受無量壽經擲丹經燒棄假
使隔弱水三萬里蓬萊嶋猶有身裡蓬萊十二樓韻府
呂洞賓拋袖裡青蛇參黃龍禪師以海外蓬萊嶋換唯
心淨土者也

○評曰此詩述人人竟歸遷流示不二之寶處北邙是
必屍拋向之地蓬萊是神仙長生之境寒山子依什麼
今指北邙道蓬萊嶋哉若人見徹徹底分明許汝自稱
長生久視神仙若未然依州附木野鬼閑鬼
竟日常如醉流年不暫停埋著蓬蒿下曉月何冥冥骨肉
消散盡魂魄幾凋零遮莫敲缺口無因讀老經

如醉詩黍離篇曰中心如醉蓬蒿祖庭事苑六曰漢田
橫以門人傷之遂為悲歌言人命如薤上露易晞滅也
亦謂人死精魂散於蒿里冥冥後漢書張奐傳曰奐光
和四年卒年七十八遺命曰地底冥冥長無曉期遮莫
事文類聚別集六曰藝苑雌黃曰遮莫蓋俚語猶言儘
教也敲缺佛祖三經注曰世諦之樂盡為苦本虛受信
施負債何疑啣鐵負鞍猶是輕輕之報老經老子經也
○評曰此詩述無常讀老經者彼經雖委說示谷神不
死之大道一度陷泉下則不能再讀也雖然今所謂老
經者非特指李昉留下底陳編而已矣
一向寒山坐淹留三十年昨來訪親友太半入黃泉漸減

如殘燭長流似逝川今朝對孤影不覺淚雙懸

淹留左傳注淹久也太半漢書音義曰韋昭曰凡數三分有二為太半如殘燭涅槃經十一曰譬如燈炷唯賴膏油膏油既盡勢不久停人亦如是唯賴壯膏壯膏既盡衰老之炷何得久停逝川論語子罕篇曰子在川上曰逝者如斯夫不舍晝夜孤影文選潘安仁寡婦賦曰廓孤立兮顧影塊獨言兮聽響注曰丁儀妻寡婦賦曰賤妾榮榮顧影為儔淚雙懸杜詩曰素交零落盡白首淚雙垂

相喚採芙蓉可憐清江裡遊戲不覺暮屢見狂風起浪捧鴛鴦兒波搖鷓鴣子此時居舟楫浩蕩情無已

清江杜子美題江村詩曰清江一曲抱村流鴛鴦鷓鴣天寶遺事曰五月五日明皇避暑遊興慶池與妃子晝寢於水殿中宮嬪輩徒欄倚檻爭看雌雄二鷓鴣戲於水中常時擁貴妃於綉帳內謂宮嬪曰爾等愛水中鷓鴣爭如我被底鴛鴦鷓鴣五色尾有如船舵小於鴨見于書言

○評曰此詩寒山和盤托出底驪珠

吾心似秋月碧潭清皎潔無物堪比倫教我如何說

○評曰此詩賦寒山得力之處絕等比言吾禪心高閑圓明恰如秋月十分光粲無一點瑕翳雖秋月無瑕翳中間有銀盤昇沈底物所以棄棄去比碧潭徹底皎潔

明淨雖碧潭皎潔四面有坳丘際涯底物所以棄棄去
望西東無物可比况所以言使我如何說

垂柳暗如烟蜚花飄似霰夫居離婦州婦住思夫縣各在
天一涯何時得相見寄語明月樓莫貯雙蜚鶯

天一涯文選古詩曰行行重行行與君生別離相去萬
餘里各在天一涯明月樓曹子建七哀詩曰明月照高
樓流光正徘徊上有愁思婦悲歎有餘哀注曰高樓思
婦見月而思切也雙蜚鶯文選古詩曰思為雙蜚鶯銜
泥巢君屋

○此詩又是寒山紫羅帳裏真珠

有酒相招飲有肉相呼喫黃泉前後人少壯須努力玉帶

暫時華金釵非久飾張翁與鄭婆一去無消息

有酒相招飲陶淵明雜詩曰得歡當作樂斗酒聚北隣
少壯文選古樂府曰少壯不努力老大徒傷悲金釵文
選曹子建樂府詩曰頭上金爵釵腰佩翠琅玕

可憐好丈夫身體極稜稜春秋未三十才藝百般能金羈
逐俠客玉饌集良朋唯有一般惡不傳無盡燈

稜稜韻會稜亦作稜漢書李廣傳曰威稜愴乎鄰國注
李奇曰神靈之威曰稜春秋後漢書樂恢傳曰富於春
秋注曰春秋謂年也金羈逐俠客文選曹子建樂府詩
曰白馬飾金羈連翩西北馳借問誰家子幽并遊俠兒
祖庭事苑俠音叶拔之言俠也以權力俠輔人也荀悅

曰立氣齊作威福結和文以立疆於世者謂之遊俠史
曰今游俠其行雖不軌於正儀然其言必信其行必果
已諾必誠不愛其軀赴士之阨困既已存亡死生矣而
不矜其能羞伐其德蓋亦有足多者焉玉饌猶珍饈良
朋仲長統樂志論曰良朋萃止則陳酒有以娛之嘉時
吉日則烹羔豚以奉之無盡燈維摩經第四曰譬如一
燈然百千燈冥者皆明明終不盡如是諸姊夫一菩薩
開導百千衆生令發阿耨多羅三藐三菩提心於其道
意亦不滅盡隨所說法而自增益一切善法是名無盡
燈

○評曰人人有家裡常住不生不滅底一段冷焰在凡

愚毫釐不欠缺在賢聖錙銖不增添清淨圓明妙明虛
靈了之則爲賢聖佛祖失之則爲凡愚鬼畜在凡謂之
心火執置此於道德仁義之上則陰陰熠熠而將泯沒
置此於好醜五欲之上則光耀熾盛而周流十虛收歸
微細憎愛欣厭片時無休罷貪焰瞋火焦爛諸根燼滅
法財終化阿毘紫焰成無間鑊湯在聖謂之智光含容
大千全不見纖塵歸入隣虛廣於十虛行法施於三祇
無乏傳靈照於萬有無盡夫斯謂之無盡燈

桃華欲經夏風月催不待訪覓漢時人能無一箇在朝朝
花遷落歲歲人移改今日揚塵處昔時爲大海

桃花古文前集宋之問有所思詩曰洛陽城東桃李花

飛來飛去落誰家又曰年年歲歲花相似歲歲年年人不同揚塵處列仙傳云麻姑謂王方平曰自接待以來見東海三變為桑田向到蓬萊山水略半也豈復為陵乎方平曰東海行復揚塵耳

我見東家女年可有十八西舍競來問願姻夫妻估烹羊煮眾命聚頭作姪殺含笑樂呵呵啼哭受殃扶

東家女文選宋玉登徒子好色賦曰天下之佳人莫若楚國楚國之麗者莫若臣里臣里之美者莫若臣東家之女估詩君子于役篇曰君子于役不日不月曷其有往注估會也殃左傳襄公二十八年穆子曰善人富謂之賞淫人富謂之殃天其殃之也其將聚而殲旃

○評曰此詩詞世人婚姻日往往害物命作慶會是盡地獄回

田舍多桑園牛犢滿廐輟信有因果禰皮早晚裂眼者消磨盡當頭各自活紙袴瓦作禪到頭凍餓殺

禰皮智度論云譬如牛皮未柔不可屈折無信人亦如是

○評曰此詩呵世癡福人常行惰奢恣打不善一朝福力盡禍害聚日百計亦不可救是畢竟依不知因果紙袴瓦作禪夫紙不可作袴而把裁袴著夫瓦不宜禪而把綴禪帶其落魄鬼怪驚目之形模即當破墮反常之體裁如展一幅巧畫是自寒公超過人意之表遊戲文

是已開卷一

字之外出格脫洒活達微妙三昧力唱出者也但恨無知音抱腹大笑

我見百千狗箇箇毛鬣鬣卧者渠自卧行者渠自行投之一塊骨相與唯喋爭良由爲骨少狗多分不平

一塊骨大般若論曰有擲塊於犬犬逐塊也塊終不止戰國策昭襄王篇曰秦相應侯曰見大王之狗卧者卧起者起止者止毋相與鬪者投之一骨輕起相牙者何則有爭意也鬣鬣髮亂上士行切下女耕切唯喋狗欲噬也法華譬喙品科註唯喋嗥吠者發言論決是非之理也唯喋張唇露齒也

○評曰此詩比也何世人爲小利鬪爭困苦

極目兮長望白雲四茫茫鴉飽腹脰鸞鳳飢徬徨駁馬放石磧蹇驢能至堂天高不可問鷓鴣在滄浪

脰脰肥兒文選善注曰阿那脰脰舒遲兒鸞鳳賈誼弔屈原賦曰鸞鳳伏竄兮鴉鵲翱翔徬徨徘徊也文選向曰徬徨心不安也蹇驢賈誼屈原賦曰騰駕罷牛驂蹇驢兮驥垂兩耳服鹽車兮

洛陽多女兒春日逞華麗共折路邊花各持插高髻髻高花峇匝人見皆睥睨別求醪醪伶將歸見夫婿

華麗文選陸士衡擬古詩曰京洛多妖麗高髻後漢書列傳十四馬廖傳曰長安語曰城中好高髻四方高一尺峇匝當作匝匝周繞也杜詩馬頭金匝匝睥睨文選

注曰睥睨含喜微笑以竊視義也流眄兒又中庸注睨邪視也醜彙所斬切酢味也夫婿詩格十四許裴詩自家夫婿無消息卻恨橋頭賣卜人

○此詩全體提起

春女銜容儀相將南陌陸看花愁日晚隱樹怕風吹年少從傍來白馬黃金羈何須久相弄兒家夫婿知

銜韻會音眩自矜也法華經安樂行品曰銜賣女色未選曹子建求自試表註引越絕書曰銜女不貞銜士不信陌梁武帝河中之水歌曰十四採桑南陌頭韻會阡陌甲間道南北曰阡東西曰陌又市中街曰陌

羣女戲夕陽風來滿路香綴裙金蛺蝶插髻玉鴛鴦角婢

紅羅纈闌奴紫錦裳為觀失道者鬢白心惶惶

滿路香開元遺事曰都中名姬楚蓮香者國色無雙時貴門子弟相詣之蓮香每出處之間則蜂蝶相隨蓋慕其香也角婢謂了角小婢也纈韻會結也絲纈也闌奴謂闌豎乎惶胡光切音黃惑也恐也

○此詩毀刺自省

若人逢鬼魅第一莫驚懷捺硬莫采渠呼名自當去燒香請佛力禮拜求僧助蚊子釘鐵牛無渠下背處

鬼魅法華文句十陀羅尼品釋曰咒者是鬼神主名也稱其王名部落敬主不敢為非故能降伏一切魍魎○評曰此詩欠一時粥飯世有稱白澤圖者雖未詳來

故戶戶有之故且茲記其圖曰黃帝巡狩到於東海濱時白澤出能言語以足知萬物情除民時害賢君明則顯天地祥瑞也涉世錄二十一曰李子問曰人家或有糟呼或有金鳴是何怪乎對曰昔軒轅黃帝問白澤曰天下寧靜見何怪乎白澤乃曰若要解怪但將白澤圖於掌上挂之雖有妖怪不能成災赤蛇落地鬼名大扶鷄生鞭子鬼名彩女見蛇相交鬼名神通霄間鷄聲鬼名賊吏蛇入人家鬼名孔禽鳥屎污衣鬼名飛遊狗上入屋鬼名春女雌作雄聲鬼名夙龍狗行反耳鬼名太陽野鳥入屋鬼名不穴狗上屋上臥鬼名神霞狐狸作聲鬼名懷珠鼠耕破地鬼名金光血污人衣鬼名遊幾

飯甑作聲鬼名歛女夜夢不祥鬼名臨月鼠聲唧唧鬼名金曹竈前生飯菜鬼名水淡予謂呼名自當去呼名衆說甚不諦當有人常受持神咒諳得白澤語底見鬼魅時或誦咒或呼名避彼災害雖然擇千百人求誦咒人七八箇亦難得擇千百人求憶持白澤語底二三箇亦難得縱復有諳得白澤語底人鬼若現殊形異貌變化無窮為何鬼魅崇呼彼名思議尋討間必為彼驚落心魂諺曰心動則鬼神振鐵杖又曰驚怖妄起主心不定故然便呼名者返照自心謂乎返照自心則是喚起自己本來人者也自己本來人纔出頭則柳失綠花失紅火失熱水失冷其光明盛大而透漢徹泉名之為毘

盧全身名之爲金剛正眼十方法界不見佛不見祖上
下四維一團寶光聚開神野鬼乞命無暇何處留痕跡
問自心如何喚起曰行路若見瑞岩老低頭合掌子細
問訊五燈會元瀉山章曰蚊子上鐵牛無汝下觜處蓋
謂瀉山本於寒公語乎

浩浩黃河水東流長不息悠悠不見清人人壽有極苟欲
乘白雲曷由生羽翼唯當鬢髮時行住須努力

浩浩水廣流兒黃河事文類聚前集十六引王子年拾
遺記曰丹丘千年一燒黃河千年一清左傳襄八年曰
子駟曰周詩有之曰俟河之清人壽幾何注曰言人壽
促而河清遲後漢書趙壹傳云有秦客者乃爲詩曰河

清不可俟人命不可延曷何也鬢詩君子偕老篇曰鬢
髮如雲注曰鬢黑也又桐髮黑髮也努力文選古樂府
曰少壯不努力老大徒傷悲

○評曰此詩專賦遷流無常問鬢髮時須努力如何努
力得成菩提答若真箇努欲得菩提須見性一回若無
見性眼行萬行縱歷僧祇劫數總是生死大兆
乘茲朽木船采彼維婆子行至大海中波濤復不止唯齋
一宿糧去岸三千里煩惱縱何生愁哉緣苦起

煩惱涅槃經第三十四迦葉品迦葉菩薩白佛言煩惱
者所謂惡也從惡煩惱所生煩惱又名爲惡如是煩惱
則有二種一因二果因惡故果惡果惡故子惡如維婆

果其子苦故華果莖葉一切皆苦猶如毒樹其子毒故
果亦是毒云云同第二十九卷云如維婆蟲樂維婆樹
迷惑愛著生歿臭穢又俱舍頌疏第十八卷從賃婆種
賃婆果生其果大小如苦練子其味極苦

○評曰此詩說人世危殆朽木船者五蘊形質也維婆
子者苦果也言人人乘四大假合幻化敗壞漏船錯作
堅固安逸思恣五欲貪求五塵苦果永在生歿苦海中
是故利衰譏譽八風碎四山怒吼貪嗔癡慢萬浪浸九
天漲激永夜長劫苦聚無間斷齋一宿糧者言只一念
希望貪求妄心而已寔一點無菩提資糧貯去岸三千
里者言涅槃常樂彼岸雖湛然而不離當處觸目皆是

而塵塵利利寂光本土被三毒電影障礙終隔三千萬
里波浪永流轉三界二十五有苦趣因什麼如是者諸
苦所因貪欲為本故以苦因結苦果譬如維婆果何時
有休期寔可悲也

默默永無言後生何所述隱居在林藪智境何由出枯槁
非堅衛風霜成天疾土牛耕石田未有得稻日

無言論語陽貨篇曰予欲無言子貢曰子如不言則小
子何述焉子曰天何言哉四時行焉百物生焉天何言
哉枯槁莊子齊物論篇曰形固可使如槁木而心固可
使如死灰乎今之隱几者非昔之隱几者也石田史記
子香曰猶石田無所用注石田不可耕也述彙食律切

音術循也又紀人之事纂人之言皆曰述

○評曰此詩賦方等彈呵大旨以責緘默枯坐一生背
盧屠地而學彼小乘偏執窮子錯為佛法底默照邪黨
詩所謂默默永無言後生何所述言學道人豈夫一向
無靜坐耶夫如真正衲子其初且癡定兀坐起大疑團
奮大精神沈吟純工一朝乍寂滅現前瞎卻凡聖不二
正眼打失魔佛同時真理而後觸忤真正明眼宗師拔
卻千尺劔樹爪牙擊碎萬斛雜毒命符踏翻佛界遊戲
魔界建通上孤危法幢開徹下嶮峻爐鞴斬奪人天命
脉刺害佛祖慧眼而以為報恩是鷹將搏者先攢攫將
伸者先屈義也豈効彼我空偏枯流類一生空守棺木

去者哉有一般外無訪師求道大志內無自性圓頓正
見徒空盡自家生滅心終灰心泯智如古廟裏香爐去
而後欲成大道徒日日默坐今年恁麼死揭懶地去明
年亦恁麼死揭懶地去十年五歲終到頭白齒黃眼枯
耳周依舊只是一箇死揭懶地縱有後生門徒呼什麼
為我師教示述行之述循之義故若又以彼默坐為窮
竟循行之則有五箇門人五箇死揭懶有八箇弟子八
箇死揭懶非唯不能利他自救亦不了而已恁麼默默
在林藪陋巷地重歲月依然不能出離從前智境庵宅
智境者以欲空盡思念而成道果為能趣智以寂默昏
湛處為所趣境是不覺陷墜偏小空果邪坑者也枯槁

非堅衛者言大凡出家者訪明師隨良友成辦自家犀
裡金剛不壞正體得作法城金湯永留佛祖慧即是大
丈夫兒能事而出家兒懷素可謂法門堅固衛護也豈
空如槁木灰去消信施者哉者般漢子以枯渴思念
摧殘情念為懷恰如仲冬風刀嚴寒霜刀竟為自己天
然固疾自然重病佛祖亦不能醫治土牛耕石田者
牛性遲鈍者也况夫土牛乎其狼滯癡澁寔可知石田
者四面悉沙石而徹底無一滴膏土者也鞭彼土牛耕
彼石田縱歷驢年寸草青亦不能見也况彼嘉禾并穗
秋成哉是比二乘偏真行者終不能得菩提妙果蓋夫
如真正佛子則不然憤起傑烈勇猛信心激發長劫不

退大志潛行密參終刺瞎娘生雙眼睛蹈斷生外罪累
根窮決祖師最後因緣跨跛盲驢鞭瞎外虎普惱害方
來衲子以充大法施所以大丈夫論曰財施在入道中
法施在大悲中財施除衆生身苦法施除衆生心苦財
施作無盡錢財法施作無盡智財財施為得身樂法施
為得心樂財施為衆生所愛法施為世間所敬財施為
愚人所愛法施為智者所愛財施與現樂法施與天堂
涅槃樂偈云佛智處虛空大慈為密雲法施如甘雨充
滿陰界地四攝為方便安樂解脫因修治八正道得淨
槃果又未曾有經天帝問野干曰施食施法有何功德
曰布施飲食者濟一日命布施珍寶者濟一世之增繫

縛說法教化為法施能令眾生生出世間法佛說施中
 法施為第一財施有量法施無量財施欲界報法施出
 三界報財施不能斷滿法施清昇彼岸財施感天人報
 法施通感三乘果財施智愚俱用法施唯屬智人財施
 能得福法施益能所財施益色身法施利心神財施增
 貪病法施除三毒大集經曰施寶雖多不如至心誦持
 一偈法施最妙勝過飲食優婆塞戒經曰若有比丘比
 丘尼優婆塞優婆夷能教化人具足戒施多聞智慧若
 以紙墨令人書寫若自書寫如來止典然後施人令得
 讀誦是名法施如此施人者未來世中天上得好上色
 何以故眾生聞法斷除瞋心以是因緣未來世中得成

上色眾生聞法慈心不殺以此因緣未來世中得成上
 色得壽命長眾生聞法不盜他財寶以是因緣未來世
 中多饒財寶眾生聞法開心樂施以是因緣未來世中
 身得大力眾生聞法離諸放逸以是因緣未來世中身
 得安樂眾生聞法除瞋癡心以是因緣未來世中得無
 碍辯眾生聞法信心無碍以是因緣未來世中信心明
 了戒施聞慧亦如是故知法施殊勝過於財施鵝林曰
 海藏龍宮一切經卷序正流通間無不演法施功德寔
 知法施可貴勝因雖然纔交名聞利養心挾憍慢勝行
 心則名之為不淨說法卻是為地獄惡果是故法施寔
 可貴法施寔可恐也淨名曰莫以生滅心說實相法又

曰不具真正智見不能辨人根機妄莫說法莫對大乘機說小乘法信哉邪人說正法正法成邪法蓋施有大施有小施往往學佗人只頭三昧纏取一兩卷經書胡亂臆覺情解來聚無智男女打杜選雜話了自道行法施是何心行一等有賤賣僧部屬諂賣緇流類到處誰噪閭閻聚多少瞎老婆跛臭婦足亦不洗底賤人纏見一人則召召招喚閭閻和笑善來諸善士疾來坐彼與彼昨所見其與其今初來那何某衰邁來著爐何某邑長先坐上頭莫恐怖莫隔碍我見公輩如佛菩薩相何故人人具有不劣佛不異祖底佛性故知火熱了水冷底物是也我有不轉肉身即坐成佛法居吾語你於此

傾心腸洗肝膽臭說穢話自午時說到晡時張三亦悟去李四亦會了於此老幼奔波擬靈鷲一會稱龍華三會拋錢財如飛蝗積束帛如蒸雲動人心有滿慈辨財聚信施有目連神通是道不淨說法任佗玉饌溢器開蟲珍饈堆盤生毛如真正辨道上士縱雖饑眼暗渴倒死總所不顧也專慈念以清淨心行依四弘願行誘引教化是為小施禪門即不然專行大施以之為報恩所謂大施者片言不放點滴不施學者水亦不請佗一滴是為心要夫禪門非所以恐生死勤求涅槃者禪門非所以厭穢土志念淨土者禪門非所以行禮拜恭敬以為究竟貪求功德者禪門非所以誦神咒唱經文希望

奇驗者禪門非所以行衆善期佛果者禪門非所以枯
坐泯智歸斷滅者禪門非所以多拜多禮扣多少神佛
貪禱福德者禪門者非所以死守規矩準繩以爲極則
者禪門者非所以撚亂棒放胡喝張勢威者禪門者非
所以爪水精珠擊金香爐銜殊勝者禪門者非所以緣
人情繩索羅籠學者者禪門者非所以諛權勢阿貴顯
種利用者禪門者非所以莊嚴佛像飾堂閣以當佛法
者禪門者非所以恃博覽強記高抗自負者禪門者非
所以瞎問盲答好勝負者禪門者非所以嗜文藻綴詩
偈釣聲名者禪門者非所以鬧熱多衆徒消信施者禪
門者非所以寂默靜慮偷安閑終世者禪門者非所以

不淨說法貪財施者禪門者非所以銜賣下火道號積
錢帛者禪門者非所以說相似禪瞎卻佗人眼者禪門
者非所以鑽腋出羽妨學者悟門者禪門者非所以按
牛頭喫州塗糊佗面門者禪門者非所以未得謂得未
證謂證欺誑佗人者禪門者非所以憎違自家所見厭
惡佛經祖錄者禪門者非所以認得見聞覺知識神以
爲直指者禪門者非所以認以識賴耶闇窟爲佛心者
禪門者非所以認佗人胡亂所說爲自得者禪門者
非所以人授死法爲一生擬議不來底鈍漢者禪門者
非所以舐人涎唾以爲見性者禪門者非所以認無事
窠臼日日打睡空消信施者禪門者非所以銜販自底

阿魏謗抑他藥功者只願追慕南泉長沙黃檗首山
霜韶石黃龍楊岐真淨東山息耕妙喜遺韻再挽回真
正參玄古風只單單以佛祖卜傳妙道挂在眉間水亦
不受他一滴三二十年精鍊刻苦見刺盡滲漏脫遂透
徹祖師最後因緣敷參天荆棘鎖向上空關如饑鷓窺
尖兔似惡虎嘯丘壑佛祖亦不好親近他以待俊逸豪
邁宿披靈骨底衲子施惡毒鉗鎚垂辛辣手脚驅耕棄
亂拔釘除楔誓打出一箇半箇挑慧日於澆季雷真風
於末運以報答佛祖莫大深恩焉是我黨懷素當家古
實也今時即不然盡道求心罷處即是菩提一念不生
即是佛於此不知一丁底瞎禿不堪一炷底癡奴懶產

業不能養妻子剃頭入寺底懦父簇簇并圍大口雄辯
恣打雜話來纔上蒲團乍春睡頭亦將落恰似舟子并
列一等推櫓堂外竊望羨見合掌讚嘆曰可貴滿堂盡
是禪定成熟諸大士寔希有一會其中見未能睡底即
浪笑指曰彼是求心未休底嗟似即似任他睡得十成
你若未一回見性許你和睡未睡總是一箇無明革囊
也大錯了夫求心休者參玄功畢棘林透過後依舊眼
橫鼻直火煖水冷名之真正大休罷底時節若未然如
客路人強自勤拗息歸心豈如還鄉歡喜哉不見經中
曰太子次到苦行林中尼連禪河側安禪定坐苦修六
年瘦如枯木終閻浮樹下在吉祥草褥上霍然大悟自

思惟我所得法甚深難解衆生不能信受生誹謗當墮惡道迦葉尊者十二行清苦非今人可及如脇尊者聖壽八十脇終不到席二祖大師少室峯臘雪埋腰常禪師結艸菴於大梅絕頂荷葉衣松華食三十年戴八寸鐵塔警睡眠趙州和尚結燼木爲禪牀脚專窮明大事楊岐和尚破屋二十年滿牀吹雪真珠百丈大師一日不作一日不食大醫禪師攝心無寐凡六十年玄沙和尚食纔接氣常終日定坐靈祐禪師在大瀉峯頂四十年精修無堂宇無常住如慈明和尚寔祖庭精進幢也在汾陽不顧河東苦寒辨道刺錐於股不眠其得力果而爲西河獅子王已哉一掃四海今其有誰哉寶志和

尚一座十日象骨老師打坐七日有四十年擁葉不展臥草國師有一生涯煨芋咽糞火老骨紫野二十八年乞者隊裏精鍊華圃許多年爲細民奴僕清苦如北甲鹽嶺古佛每禪坐或五日或七日氣息必絕人見以爲逝果而其得處照耀古今如東奧瑞岩開祖初在徑山打坐僧堂後架者三年臀骨破頭腦腫爛蟲湧一寸如由良導師在大宋九年常帶淚坐其餘古聖苦修不暇枚舉每思念如上芳躅雖仲冬嚴寒日背後必有汗矣我輩何人哉怪哉古者大難今時甚易取易乎取難乎雖不及我取難矣何故夫今時易幸易甘而從之則空認得光影不能及小果聲聞恰如狐狸在舊窠自救亦

不了古難忘難從之則果而徹法淵源為真正賢聖佛
祖佗後利濟羣生恰如老龍行雲雨寔痛快也太丈未
兒其擇之山野初在叢林日一堂四五十輩盡道堂中
大半是抱道得力上士也處處叢林類皆然予竊謂雖
未運澆季佛法未墜地在佗後大有可觀事常不堪歡
喜既而今回顧西東寥寥而無聲無臭何哉得力當否
乎將又別有端由乎夫絲者非擲人淚袋非袋墨淚滴
千行岐非斷人腸刃非刃籍腸痛九回禪非刺人心肝
戟非戟我心肝碎欲落有志人見此文喪盡誰無此嘆
所恨我嘆果而亡羊補牢之類乎寔可悲矣

山中何太冷自古非今年沓嶂恒凝雪幽林每吐煙草生
芭種後葉落立秋前此有沈迷客窺窺不見天

沓嶂文選註重山也芭種五月節立秋七月節曆書五
月節曰芭種沈迷客劉從益詩陰魄沈迷終鬼錄陽精
飛鍊卽心全三山縹紗誰能到日下身安亦是仙

○評曰此詩賦無明長夜境界山中何太冷者言無明
人我山中終不能逢慧日照耀故其凍餒饑寒不可忍
是非今日如此而已未來永劫貧困可知沓嶂恒凝雪
者沓彙達合切重疊也言人我重疊溪山一點不能觸
般若智火故慳貪執著冰雪鎮堅剛而諂曲阿諛稠林
晝夜吐煙苦聚可知艸生芭種後者根本所見顛倒故
萬境皆顛倒此有沈迷客者此中長者子迷中添迷暗

上重暗何可得見阿字不生慧且

山客心悄悄常嗟歲序遷辛勤采芝朮按斥詎成仙庭廓
雲初卷林明月正圓不歸何所爲桂樹相留連

悄說文憂也詩憂心悄悄芝朮三體詩許渾詩曰更欲
尋芝朮南山便寄家注芝瑞草本草有赤白黑青黃等
芝朮本草一名山薊一名山姜一名山連並久服輕身
延年不飢按彙疏鳩切音菟索也求也桂樹文選劉安
招隱士曰攀援桂枝聊淹留沈休文學省愁卧詩曰山
中有桂樹歲暮可言飯

○評曰此詩賦鍊鍛道士終無所益山客者谷飲岩棲
求長生底道士也悄悄常懷憂愁不安不樂也因何如

此今千辛萬苦雖求久視術歲序隨日遷流形骸逐歲
困衰雖尋覓伏苓葛根等藥物耕破山徑鑿開林藪按
斥揮拾不見一箇成得仙道底漢魏之時人庭廓雲初
卷者人人本具底寒山定不老不死鄉國霧盡雲收洞
然明白寥廓虛靈只一輪明月而已也因何不歸入人
人具有底家山徒辛苦求丹竈功麼皆盡老死而道士
舊棲修鍊場者山月而已桂子發天香依舊畱連也
有人坐山陁雲卷兮霞纓乘芳兮欲寄路漫兮難征心惆
悵狐疑年老已無成衆嗷嗷斯蹇獨立兮忠貞

陁奚輕切音刑廣韻連山中絕也有人坐山陁楚辭九
歌曰若有入兮山阿被薜荔帶女羅乘芳文選古詩曰

涉江采芙蓉蘭澤多芳艸采之欲遺誰所思在遠道路
漫同古詩曰還顧望舊鄉長路漫浩浩心惆悵狐疑同
曹子建洛神賦曰感交甫之棄言兮悵猶豫而狐疑惆
悵玉篇悲愁也增韻失志望恨兒無成楚辭遠遊篇曰
聊仿佯而逍遙兮永歷年而無成斯蹇宋玉九辨曰蹇
淹留而無成又九章曰何獨樂斯之蹇蹇兮願蓀美之
可完嗶咿屈原卜居篇曰嗶咿儒兒註云強語笑獨立
文選李蕭遠運命論曰夫忠直之迂主獨立之負俗理
勢然也

○評曰此詩述賢才在野不逢聖明之君嘆有楚辭體
裁有入坐山陁者寒公自言也言寒小子既入得大道

坐斷本分家山雲卷兮霞纓者自是人迹不到底妙峯
頂也秉芳兮欲寄以此道德餘薰施與一切人欲利益
人天路漫相隔絕也是非寒山子捨隔世人人人自築
人我山岳培慵慢林樹終難救濟也是故或惆悵或狐
疑斯蹇者寒山子今窮巷凍饑貧士而不見信受教化
底一人是故人皆雖冷笑輕忽誰知乾坤大地寒公一
箇全身萬象森羅日月星彩總是寒山萬德瑞相好此
時無不度盡底衆生無漏聖化底品類是故言獨立兮
忠貞

豬喫人肉人喫豬腸豬不嫌人殞人返道豬香豬人
拋水內人外掘土藏彼此莫相噉蓮花生沸湯

蓮華佛劫禪師戒殺文曰貪他一鱗又還他一鱗古聖
畱言終不偽若能戒殺勤念佛決到蓮臺上品會必矣
○評曰此詩呵四生互相噉食而生必無究

快哉混沌身不飲復不尿遺得誰鑽鑿因茲立九竅朝朝
為衣食歲歲愁租調千箇爭一錢聚頭亡命叫

混沌莊子應帝王篇曰南海之帝為儵北海之帝為忽
中央之帝為渾沌儵與忽時相與遇於渾沌之地渾沌
待之甚善儵與忽謀報渾沌之德曰人皆有七竅以視
聽食息此獨無有嘗試鑿之日鑿一竅七日而渾沌歿
租調後漢書明帝本紀曰勿收今年租調租宗蘓切音
租上聲田賦也又聚也詩豳風予所畜租唐武德二年

初定租庸調去注曰有田則有租有家有調有身有庸
租出穀庸出絹調出繒云云爭一錢事文類聚前集二
十六曰曹子建樂府曰巢許茂四海商賈爭一錢亡命
史記張耳傳曰張耳嘗亡命游外黃注崔浩曰亡無也
命名也逃匿則削除名籍故以逃為亡命外黃處名也
啼突緣何事淚如珠子顆應當有別離復是遭喪禍所為
在貧窮未能了因果冢間瞻外屍六道不干我

淚如珠子顆蒙求上卷曰淵客泣珠舊注引博物志云
鮫人從水中出向人家寄住積日賣絹臨去從主人索
器泣而出珠滿盤以與主人別離楚辭九歌曰悲莫悲
兮生別離

○評曰此詩聞人啼哭聲卒然而述者也六道不干我者言生歿輪轉皆盡安心假我所爲而本有自性真我上者毫釐不相干也

婦女慵經織男夫懶耨田輕浮耽挾彈跼躑拈抹絃凍骨衣應急充賜食在先今誰念於汝苦痛哭蒼天

輕浮阮嗣宗詠懷詩曰平生少年時輕薄好絃歌見文選挾彈說苑曰吳主欲重刑諫者死舍人曰園有蟬悲鳴飲露不知蟪蛄之在其後蟪蛄捕蟬不知黃雀之在其後臣挾彈丸欲取黃雀不覺露沾衣如此皆務欲得其前不顧其後吳主乃罷跼躑韻會跼的協切一曰徐行也又行曳履也躑所綺切說文舞履也徐曰躑履謂

足跟不正納履也引史記邯鄲女子跼躑履舞者足踵不正納也前漢雋不疑傳躑履起迎師古曰履不著跟曳之而行言其遠也史記貨殖傳拈抹取撚也

不行真正道隨邪號行婆口慙神佛少心懷嫉妬多背後噎魚肉人前念佛陀如此修身處難應避奈河

行婆禪書之中婆子之行道者名爲行婆或爲道婆如龐行婆陳道婆稜行婆類嫉妬楚辭註害賢曰嫉害色曰妬修身涅槃經二十九曰若不能攝五情諸根名不修身不能受持七種淨戒名不修戒奈河地獄也翻譯妙義集云捺落迦此云不可樂亦云苦具或曰那落迦世有一等愚茫茫恰似驢還解人言語貪姪狀若豬陰熾

難可測實語卻成虛誰能共伊語令教莫此居

貪姪狀若豬義楚六帖二十四引雜阿含云有行欲豬
貪糞豬糞中眠立自樂為餘不知人亦如是自行惡欲
為餘不知險巖莊子列禦寇篇曰孔子曰凡人心險於

山川難於知天

有漢姓傲慢名貪字不廉一身無所解百事被他嫌外惡
黃連苦生恰白蜜甜喫魚猶未止食肉更無厭

黃連本艸綱目十三黃連下注曰黃連性寒味苦白蜜
同三十九有蜂蜜或名石密或名白蜜說

縱你居犀角饒君帶虎睛桃枝將辟穢蒜殼取為瓔暖腹
茱萸酒空心枸杞羹終歸不免死浪自覓長生

犀角本艸犀能避邪精鬼魅中惡毒氣或說辟塵犀辟
邪犀辟寒犀桃枝禮記檀弓下篇曰君臨臣喪以巫祝
桃茢執戈惡之也注曰桃性辟惡鬼神畏之云云又事
物紀原八桃版桃符說當并看蒜殼翻譯名義集十物
篇曰五辛一葱二薤三韭四蒜五興渠茱萸酒羣王府
曰費長房謂桓景曰汝家九日當有災厄急宜去令家
多作絳囊盛茱萸以繫臂登高飲菊花酒此禍可消景
如言舉家登山夕還見鷄狗牛羊一時暴死云云帶虎
睛事迹未詳狗杞事文類聚後集二十九朱孺子幼事
道士王元成居大若巖一日汲于溪見二華犬因逐之
入于狗杞叢下掘之根形如二犬烹食之忽覺身輕飛

千峯上雲氣擁之而去

卜擇幽居地天台更莫言猿啼谿霧冷嶽色草門連折葉覆松室開池引澗泉已甘休萬事采薇度殘年

益者益其精可名爲有益易者易其形是名爲有易能益復能易當得上仙籍無益復無易終不免於厄

○評曰此詩呵道士學鍊鍛術終無益益其精者精所謂精神也素問云恬憺虛無真氣從是精神內守病可從來今言平生守一無適去專養本元氣使精神充於內則寔所謂益其精者也師近頃見爲初心辨道諸子進止不節急緩不中卻結病因往往困苦有數行葛藤甚助進修大救禪病看讀得益者寔多從前困倦懊惱

當向勞死底十之八九蘓諸子爭傳寫名道夜船閑話今與寒公益精詩大意相類故不顧繁文記于此閑話云山野初見道頃纔苦吟者兩三霜乍一夜忽然落節從前多少疑惑和根冰融曠劫生外業根徹底漚滅自謂道去人寔不遠古人三二十歲是何捏怪矣怡悅忘蹈舞者數月向後回顧日用動靜二境全不調和去就兩邊總不脫洒自謂猛著精彩重一回捨命去越咬定牙關瞪開眼睛欲寢食俱廢既而未且期月心火逆上肺金焦枯雙腳如浸冰雪底兩耳似行溪聲間肝膽怯弱而舉措多恐怖心神困倦而寐寤見種種境界兩腋鎖生汗雙眼常帶淚於此雖遍投明師廣探名醫衆方

不能救百藥總無驗或人曰城之白川山裏有巖居者
名曰白幽壽筭閱三四甲子人居隔三四里程望之如
魯似愚不好見人行則走必避人無辨其賢愚里人專
稱爲仙人間故常山氏之師範而精達天文深通醫道
有人盡禮咨叩則希吐微言退而考之大利人矣於此
寶永第七庚寅孟正中竊著行纏發濃東越黑谷到白
川邑卸包於茶店直入山谿行二里餘而乍失樵徑有
老父杳指雲煙間有黃白而方寸餘者隨山氣或顯或
隱言是幽之洞口所垂下蘆簾也予則褰裳上泐溪流
陟巉巖冰雪咬鞋雲露壓衣辛苦漸到彼簾子處風致
清絕實非人間心魂震怖肌膚戰栗且傍巖根數息者

數石振衣正襟畏鞠躬望簾子中見幽收目端坐蒼
髮垂到膝朱顏麗如素挂太布袍坐軟艸席窟中纔方
五六笏全無資生具机上一只置中庸老子與金剛般若
予則盡禮悉告病因且乞救少焉幽閉眼熟視徐徐告
曰我是山中半外陳人拾檀栗食伴麀鹿睡此外更何
知哉自慚遠勞上人來望予則轉咨叩不休也恬如捉
予手精察九候深窺五內爪甲長半寸慘乎而攢額告
曰已哉觀理過度終發此重症實難醫治者公病也若
特針灸藥三物而後欲救則雖扁倉不能發其功公今
爲內觀害勤不積內觀功終不能起是起倒依地之謂
也子曰願聞內觀之要力以修之幽肅肅爾而搖容曰

嗚呼如公好問之士也。以我昔所聞微告公乎。是養生秘訣而人知少也。公若不怠必見奇功。久視亦可期。慎莫謾告。告則非唯無益。公大有害我矣。夫大道分而兩儀在。陰陽交和。人物生。先天原氣默運。中間五臟列。經脈行。衛氣營血并昇降循環者。晝夜大凡五十度。肺金牝藏而浮膈上。肝木牡藏而沈膈下。心火太陽而位上部。腎水大陰而占下部。五臟有七神。脾腎各藏二神。呼出。心肺吸入。腎肝一呼。脈行三寸。一吸。脈行三寸。晝夜有一萬三千五百之氣息。脈巡行周身者五十次。火輕浮而常好騰昇。水沈重而常務下流。若人不察觀照。或失節思念。或過度。則心火熾衝而肺金焦薄。金母苦則

水子衰減。母子互疲傷。五位困倦。六屬凌奪。四大增殞。各生百一病。百藥不能立功。衆醫總束手。終到無所告矣。蓋養生如守國。聖主常專心於下。庸主常恣心於上。恣上則九卿傲權。百僚恃寵。曾無顧民間窮枯。野多菜色。國多餓莩。賢良潛竄。臣民曠恨。諸侯離叛。衆夷競起。終到塗炭。民庶國脉永斷。專心於下則九卿守儉。百僚勤約。常無怠。民間勞疲。農有餘粟。女有餘布。羣賢來屬。諸侯恐服。民肥國強。無違令。臣民無侵境。敵國無聞。刁斗聲。民不知戈戟。名人身亦然。至人常使心氣充下。是故無七凶動于內。四邪亦不能自外窺。營衛充。心神健。口終不知藥餌。甘酸身終不受鍼灸。疼痛庸流常使

心氣恣上恣上則左寸火尅右寸金五官縮疲六親苦
恨所以漆園曰真人之息息之以踵眾人之息息之以
喉許浚曰蓋氣在下焦則其息遠氣在上焦則其息促
上陽子曰人有真一之氣降下丹田中則一陽又復矣
人欲知始陽初復之候當以煖氣爲之信大凡養生之
道上部常要清涼下部常要溫煖夫經脉十二配支十
二應月十二合時十二如六爻變化再周全一歲五陰
居上一陽占下謂之地雷復冬至之候也真人息息之
以踵之謂歟三陽位下三陰居上謂之地天泰孟正之
候也天得之則萬物含發生之氣百卉受春化之澤至
人便元氣充於下之象人得之則營衛充塞氣力勇壯

五陰居下一陽其上謂之山地剝九月之候也天得之
則林苑失色百卉荒落是眾人之息息之以喉之象人
得之則形容枯槁齒牙搖落所以延壽書曰六陽共盡
則是全陰人易必須知使元氣常充下是養生樞機矣
昔吳契初見石臺先生齋戒問鍊丹術先生曰我有元
玄真丹神秘非上上器得不可傳古黃成子以之傳黃
帝帝三七齋戒受之夫大道外無真丹真丹外無大道
蓋有五無漏法去六欲五官各忘其職則混然本原
真氣彷彿而充目前是他大白道人所謂以我之天而
合所事之天者也又孟軻氏所謂浩然之氣是也引之
藏臍輪氣海丹田之間重歲月守之守一去養之無適

去一朝乍掀翻丹竈則內外中間八紘四維總是一枚
大還丹此時始覺得自己即是先天地不生後虛空不
以真箇長生久視底大神仙是為真正丹竈功成底時
節豈以御風跨霞縮地躡水等鎖末幻事為懷者耶攬
大洋為酥酪變厚土為黃金矣是故前賢曰丹丹田液
者肺液也以肺液還丹田故曰金液還丹白玉蟾曰
養生之要先不若鍊形鍊形之妙在乎凝神神凝則氣
聚氣聚則丹成丹成則形固形固則神全須知丹也果
而非外物千萬只在降下心火令充丹田氣海及腰脚
之間而已也予曰謹聞命且拋下禪觀努力以治為期
所恐非李士才所謂偏清降者乎制心於一處無氣血

滯碍乎幽微微而笑曰不然李氏不言哉火性炎上故
宜使之下水性就下故宜使之上水上火下名之曰交
交則為既濟不交則為未濟交者生之象不交者死之
象也李家所謂偏清降者救過學丹溪者弊也古人云
相火易上身中所苦補水所以制火蓋火有君相二義
君火者居乎上而主靜相火者處乎下而主動君火者
惟一心主也相火者宰補也蓋相火有兩般乃腎與肝
也肝比雷腎比龍故曰但使龍歸海底必無迅發之雷
但使雷藏澤中必無飛騰之龍海也澤也莫非水也莫
非下也是非制相火易上語哉又曰心煩勞則虛而心
熱心虛則補之下心以交于腎之謂補既濟之道也公

先心火逆上遂受此重病若不降下心何日得治且夫以我形模類道家者為大異釋者歟是禪也他日覺得有六可笑事大凡觀以無觀為正觀多觀者為邪觀向公以多觀見此症今救之以無觀不亦可乎公若收平生心炎意火置丹田及足心之間則胸膈自然清涼而無一點計較思想無一滴識浪情波是真正清淨觀也豈言拋下禪觀哉佛言收心於足心能治百一之病又阿含有用酥之法救心之勞疲尤妙天台止觀論病因甚精密也說治法亦盡有十二種之息能治病有緣臍輪見豆子之法大意以降下心火置丹田及足心為至要非但治病而已大助禪觀蓋天台有繫緣諦真二止

諦真者實相圓觀也繫緣者謂繫心於臍輪氣海間乃至置膝上足心間也行者用之大有利矣古我朝永平道元祖師入大宋拜如淨於天童師一日入密室請益淨曰元子坐禪時須置心於左掌上是彼顛師所謂繫緣止大槩也白雲和尚曰我常使心充腔子中匡徒領眾接賓應機之間用之無盡是蓋依素問所謂恬澹虛無真氣從之精神內守病安從來語者歟且內守之要令元氣充塞一身之中要令三百六十骨節八萬四千毛竅一毫髮許無欠缺處是亦養生秘訣也彭祖曰和神導氣之法當得密室閉戶安牀煖席枕高二寸半正身偃卧瞑目閉氣於胸膈中以鴻毛著鼻上而不動經

三百息耳無所聞目無所見心無所思如此則寒暑不能侵蜂蠆不能毒壽三百六十歲此隣於真人也又蘓內翰曰已飢方食未飽先止散步逍遙務令腹空當腹空時即入靜室端坐默念數出入息從一數至十從十數至百從百數至數百此身亢然此心寂然與虛空等如是久之下息自住不出不入時覺此息從毛竅中入萬四千雲蒸霧起無始已來諸病自除諸障消滅自然明悟譬如盲人忽然有眼爾時不用尋人指路也只要常省畧言語長養爾元氣所以道養目力者常瞑養耳根者常飽養心氣者常默予曰用酥之術可得而聞哉幽曰行者定中覺四大不調和或身心勞疲應起心作

此想譬有色香清淨軟酥如鴨卵大頓在頂上其氣味微妙而遍潤頭顱間浸浸潤下來兩肩及雙臂兩乳胸膈之間肺肝腸胃脊梁腰骨次第沾注將去此時胸中五積六聚疝癖塊痛隨心降下如水就下歷歷而有聲周流遍身溫潤雙腳到足心即止行者再應作此想彼浸浸所潤下餘流積湛暖蕪恰如世良醫聚種種妙香藥物煎湯之以盛湛浴盤中清蕪我臍輪以下作此觀時唯心所現故鼻根聞希有香氣身根受妙好軟觸身心調適此時消融積聚調和腸胃肌膚生光澤大增氣力不怠何病不治何仙不成何惠不積何道不充其效驗遲速在行人勤與怠而已走始卅歲頃多病十倍公

患也既到衆醫不顧乍得聞輒酥術綿綿修未期月衆病大半銷除今向此山中無人所放枯槁一具骨太布破袍纔挂兩三片雖三冬寒威折綿夜終不到凍損枯腸山粒既絕不受穀氣動雖及數旬終不知饑餒者皆此觀力也我今既告公以一生用不盡底秘訣我更何謂哉收目坐予亦含淚辭徐徐而下洞口木末纔懸殘陽歸來時時潛修既三年從前病患不用藥餌不假鍼灸任運除遣非特治病而已從前杖手脚不得下齒牙不得底難信難解難透難入底一著子徹底透得得大歡喜者兩三回其他省覺怡悅忘踏舞者大凡數次古雖重著二三兩襪足心常如冰者今雖九冬嚴寒日不

襪不爐且雖馬齒既隣古稀無可指病患者彼方術餘勲乎莫道鵠林記取多少無義荒唐妄談以誑惑佗上流是非爲宿有靈骨一錐既成底俊流設癡鈍如予病患類予底看讀子細觀察有小補乎只恐別人把著拍手大笑矣已上夜船開語終易其形者言百鍊功積千鍛果熟乍得換骨尸解等妙術轉得凡骨得仙骨羽化登仙者卽喚爲上仙籍若又不然詎免得死亡縱又免得一箇頑鈍守屍鬼終歸流轉不如捨去成辦無漏真淨不生不滅底法身先虛空後天地萬劫千生乘願輪來利益一切羣生同與成無上菩提若人欲知成辦法身真偽如何寒公曰咄咄三界輪回又乾峯和尚示衆曰法身

有三種病二種光你等諸人還委悉麼時雲門出眾云
菴內人因甚麼不知菴外事二尊宿語甚大難若人見
得如萬里異鄉見妻子面許你親見得法身全無餘蘊
若不然縱會得分明總是意識逼逼

徒勞說三史浪自看五經洎老檢黃籍依前注白丁筮遭
連蹇卦生主虛危星不及河邊樹年年一度青

三史韻府曰史記及前後漢書為三史五經詩書易春
秋禮記為五經黃籍黃書帙之色也文選序詞人才子
則名溢於縹囊飛文染翰則卷盈乎緗帙註曰縹青白
色細淺黃色白丁前漢書鄒陽傳曰歐白徒之眾師古
注曰白徒言素非軍旅之人若今言白丁矣註韻會註

通作注識也蹇艮下坎上之卦也易曰蹇難也險在前
也揚雄反離騷曰騁驥馮以曲躄兮驢騾連蹇而齊足
見楚辭後語虛危星惡星也左傳云玄武之宿虛危之
星也羣玉府虛危北方星也大明三藏法數四十八北
方七宿內虛宿主那遮羅國危宿主昔華冠云云
○評曰此詩嘲特博文謾願官祿示禍福緣因果
碧澗泉水清寒山月華白默知神自明觀空境逾寂

○評曰此詩賦寒山境致示真心現成
我今有一襦非羅復非綺借問作何色不紅亦不紫夏夫
將作衫冬夫將作被冬夏遞互用長年祇這是

○評曰此詩示窮劫以前窮劫以後唯此一襦而足所

謂珍御服也。禱說文短也。

白拂梅檀柄馨香竟日聞。柔和如卷霧。搖拽似行雲。禮奉宜當暑。高提復去塵。時時方丈內。將用指迷人。

○此詩須于細吟弄。

多少般數人。百計求名利。心貪竟榮華。經營圖富貴。心未片時歇。奔突如烟氣。家眷定團圓。一呼百諾至。不過七十年。冰消瓦解置。以了萬事休。誰人承後嗣。水浸泥彈丸。方知無意智。

百諾韓詩外傳曰。當前決意。一呼再諾者。人穎也。見韻瑞七十年杜詩曰。人生七十古來稀。瓦解置前漢鄒陽傳有瓦解土崩語。無意智六祖大師曰。下下人有上上。

智上上人。有沒意智。圖異作圖。

○評曰。此詩可不義。富且貴。竟歸壞滅。

寒山詩闡提記聞卷第一終

泰山詩

○ 詩曰 出師未捷身先死 長使英雄淚滿襟

奇士士入 亦不事 固是 其難

